

ԵՐԱԿՐՈՆԵԱ ՄԱՍԿՐԱՆ

ՄԱՅՐ ԱԹՈՒ ՍՈՒՐԲ ԷԶՍԻԱԾՆԻ
ԿՐՈՆԱԿԱՆ, ՄԵԱԿՈՒԹԱՅԻՆ,
ԼՐԱՏՎԱԿԱՆ ԵՐԿՇԱԲԱԹԱԹԵՐԹ



Ն.Ս.Օ.Տ.Տ. Գարեգին Բ Ամենայն Հայոց Կաթողիկոսի ուղերձը Հայրենակի և խաղաղության տոնի առիթով

Միտքի՝ ժողովուրդի հայրենիս և ի սիրտուս,
Հայրենական մեծ պատերազմում հայրենակի հորեղանա-
կան 80-ամյակը և Շուշիի ազատագրման ու Արցախի պաշտ-
պանության բանակի ստեղծման տարեդարձները նշում ենք
մեր ժողովրդի համար թանկ ու կարևոր հիշատակներով:

Յուրաքանչյուր հայրենակ ձեռք է բերվում հավատքով, ան-
դուլ մաքառումով և փորձությունների դիմակայումով: Բազմա-
դարյա մեր պատմության ընթացքում մեր ժողովուրդն անձնա-
գոհարար պայքարել է իր անկախ և արժանապատիվ կյանքի
համար՝ մշտապես ձգտելով արդարության ու խաղաղության
հաստատման: Այս գիտակցությամբ են հարյուր հազարավոր
հայրերիցներ Խորհրդային Միության այլ ժողովուրդների հետ
մարտնչել ընդդեմ ֆաշիզմի, հանուն ապահով ու բարձր աշ-
խարհի հաստատման: Այս նույն գիտակցությամբ է ազգս նաև
պաշտպանել արցախահայության՝ հարազատ հողում անկախ
ու անվտանգ ապրելու իրավունքը:

Միտքիցներ, այսօր էլ մեր ազգին ու հայրենիքին պատուհա-
սած արհավիրքների՝ Արցախի հայաթափումն, Հայաստանի
առջև ծառացած մարտահրավերների հանդիման մենք պի-
տի աննկուն մնանք մեր ոգու արիությանը, հավատքի ամ-
րությանը, լուսավոր ապագայի տեսիլքով և միշտ հիշենք, որ
նշանակալի հայրենակներ կերտել ենք միայն միասնականու-
թյամբ, հայրենիքի հանդեպ սիրով ու նվիրվածությամբ: Արդ,
խոնարհում բերելով մեր հերոսների անմար հիշատակի առջև՝
ներշնչվենք նրանց պայծառ օրինակով և համատեղ ջանքերով
ու միմյանց սատարումով շենացնենք մեր կյանքի անդադուն
նոր ձեռքբերումներով և ազգաշահ իրագործումներով:

Հայրենակի և խաղաղության տոնի առիթով Հայրապետա-
կան Մեր սերն ու օրհնությունը և շնորհավորանքն ենք հղում
Հայրենական մեծ պատերազմի վետերաններին, Արցախյան
պատերազմի մասնակիցներին և աշխարհասփյուռ համայն
մեր ժողովրդին:

Աղոթք ենք բարձրացնում աշխարհի խաղաղության, մեր
հայրենիքի ու ժողովրդի անվտանգ, ապահով ու բարձր կյան-
քի համար և հայցում Բարձրալից, որ այլևս մարդկային կյան-
քում տեղ չգտնեն ֆաշիզմի ստակալի դրսևորումները, աղետա-
լի պատերազմներ ու արհավիրքներ: Թող հարուցյալ Տիրոջ
շնորհներն ու օրհնությունը լինեն մեզ հետ այսօր և միշտ և հա-
վիտյանս. ամեն:

Ամենայն Հայոց Կաթողիկոսն այցելեց «Հայրենակ» զբոսայգի

Մայիսի 9-ին՝ Հաղթանակի ու
խաղաղության տոնի առիթով,
Ն. Ս. Օ. Տ. Տ. Գարեգին Երկրորդ Ծայ-
րագույն Պատրիարք և Ամենայն Հա-
յոց Կաթողիկոսը Մայր Աթոռ Սուրբ
Էջմիածնի միաբանների ուղեկ-
ցությամբ այցելեց «Հաղթանակ»
զբոսայգի՝ իր հարգանքի տուրքը
մատուցելու Հայրենական մեծ պա-
տերազմում և Արցախյան հերոսա-
մարտերում զոհվածների անմար
հիշատակին:

Ամենայն զինվորի հուշակոթողի
մոտ ծաղկեպսակի զետեղումից հե-
տո՝ Վեհափառ Հայրապետն աղոթք
բարձրացրեց առ Աստված հայրե-
նիքի համար իրենց կյանքն ընծա-
յաբերած քաջորդիների հոգիների
հանգստության և խաղաղության
համար:



Ամենայն Հայոց Կաթողիկոսը շնորհավորել է Հռոմի նորընտիր Սրբազան Քահանայապետին

Ն. Ս. Օ. Տ. Տ. Գարեգին Երկրորդ
Ծայրագույն Պատրիարք և Ամենայն
Հայոց Կաթողիկոսը շնորհավորա-
կան ուղերձ է հղել Հռոմի նորընտիր
Սրբազան Քահանայապետ Լևոն
14-րդ Պապին:

Վեհափառ Հայրապետի շնոր-
հավորական մամակում մասնավոր-
ապես ասվում է. «Հայաստանյայց
Առաքելական Սուրբ Եկեղեցու հո-
գևոր դասի, հավատացյալների
և Ամենայն Հայոց Հայրապետիս
անունից հղում ենք Մեր աղթական
լավագույն բարեմաղթանքները Ձեզ՝
աշխարհի չորս ծագերում ապրող

միլիոնավոր կաթոլիկ հավատացյա-
լներին հովվելու բարձր ու պատաս-
խանատու առաքելությունը ստանձ-
նելու առթիվ:

Ձեր առաքելական ծառայության
այս նոր հանգրվանում աղոթում ենք,
որ Աստված ուժ և շնորհ պարգևի
Ձերո Սրբությանը՝ ճշմարտությամբ
ու գթասրտությամբ առաջնորդելու
Կաթոլիկ Եկեղեցին և խաղաղու-
թյան, արդարության ու հոգևոր նորո-
գության կարող մերկա աշխարհում
մշտաբերուն վկայելու մեր Տեր Հիսուս
Քրիստոսի Ավետարանը:

Գոհություն և փառք ենք մա-

տուցում Տիրոջը մեր երկու քույր
Եկեղեցիների միջև շարունակվող
քրիստոնեական սիրո ամուր կապի
ու հարաբերությունների համար,
որոնք վերջին տասնամյակներում
զորացել են փոխադարձ հարգան-
քի, եղբայրական հանդիպումնե-
րի և ընդհանուր վկայությունների
շնորհիվ:

Նորին Սրբությունը մաղթել է
Սրբազան Քահանայապետին քա-
ջառոջ երկար տարիներ և հոգևոր
անպառ զորություն՝ առաջնորդելու
Աստծո կողմից իրեն վստահված հա-
վատավոր հոտին:


Կատարվեց քահանայական ձեռնադրություն

Մայիսի 4-ին, Ն. Ս. Օ. Տ. Տ. Գարե-
գին Երկրորդ Ծայրագույն Պատ-
րիարք և Ամենայն Հայոց Կաթողի-
կոսի օրհնությամբ, Միաձեռք Մայր
Տաճարում հղնթաց Սուրբ Պատա-
րագի կատարվեց քահանայական
ձեռնադրություն:

Պատարագիչն էր Գեղարքունի-
քի թեմի առաջնորդ Գերաշնորհ
Տ. Պարթև եպիսկոպոս Բարսեղյանը,
որի ձեռամբ քահանայական ձեռ-
նադրության և օծման արժանացան
Մայր Աթոռի տարբեր կառույցներում
և թեմերում սպասավորող յոթ սար-
կավազներ:

Սուրբ Պատարագի ընթացքում
Պարթև Սրբազանը, քահանայության
կոչելով նորընծաներին, Սրբալույս
Մյուռոնով օծեց նրանց ճակատներն
ու ձեռքերը, ինչպես նաև նորած
եկեղեցականներին շնորհեց նոր հո-
գևոր անուններ:

Բարեշնորհ Հովհաննես սարկա-
վազ Ասատրյանը վերակոչվեց Տեր
Սեպուհ քահանա, Հարություն սար-
կավազ Մարտիրոսյանը՝ Տեր Առն



քահանա, Հովհաննես սարկավազ
Փախլանյանը՝ Տեր Եղիա քահանա,
Մկրտիչ սարկավազ Տեր-Մկրտչյա-
նը՝ Տեր Մաղաթիա քահանա, Եփրեմ
սարկավազ Եփրեմյանը՝ Տեր Մխի-
թար քահանա, Տիգրան սարկավազ

Հակոբյանը՝ Տեր Հովսեփ քահանա
և Մայիս սարկավազ Կարապետյա-
նը՝ Տեր Վազգեն քահանա:

Այնուհետև նորած քահանաներն
իրենց անդրանիկ օրհնությունը փո-
խանցեցին ներկաներին: ➔ էջ 2

ԸՆԴՈՒՆԵԼՈՒԹՅՈՒՆՆԵՐ ՎԵՀԱՐԱՆՈՒՄ Ամենայն Հայոց Կաթողիկոսն ընդունեց



Մայիսի 4-ին Մարսելի քաղաքապետի գլխավորած պատվիրակությանը

Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսն ընդունեց Ֆրանսիայի Մարսել քաղաքի քաղաքապետ Բենուա Պայանի գլխավորած պատվիրակությանը, որի կազմում էին քաղաքային իշխանության և հայ համայնքի ներկայացուցիչներ:

Հանդիպմանը ներկա էր Հայաստանում Ֆրանսիայի Հանրապետության արտակարգ և լիազոր դեսպան Օլիվիե Դելոտին:

Վեհափառ Հայրապետն ընդգծեց, որ պատվիրակության այցը Հայաստան և Մայր Աթոռ Սուրբ Էջմիածին հայ ժողովրդի համար այս բարձր ժամանակներում ևս մեկ դրսևորում է հայ-ֆրանսիական բարեկամության և Ֆրանսիայի իշխանությունների կողմից ցուցաբերվող գորակցության:

Հանդիպմանը Հայոց Հայրապետն անդրադարձավ Մարսելի քաղաքային իշխանության և հայ համայնքի սերտ գործակցությանը:

Սրանով՝ գոհունակությամբ արձանագրելով, որ Հայոց ցեղասպանությունը վերադարձնեմ թվով հայորդիներն ապաստան են գտել նաև Մարսել քաղաքում, որտեղ և կազմակերպել են իրենց ազգային-հոգևոր կյանքը՝ օգտակար ներդրում բերելով երկրի առաջընթացին:

Իր հերթին Մարսելի քաղաքապետ Բենուա Պայանը, շնորհակալություն հայտնելով Նորին Սրբությանը ընդունելության համար, անդրադարձավ հայ-ֆրանսիական պատմական առնչակցություններին, կարևորեց տեղի հայ համայնքի և ազգային կազմակերպությունների ներդրումն ու շարունակական ներգրավվածությունը քաղաքի զարգացման գործում: Քաղաքապետ Պայանը նաև հավաստիացրեց Հայոց Հովվապետին, որ անհրաժեշտ ջանքերը կգործադրվեն հայ ժողովրդի առջև ծառացած մարտահրավերների հաղթահարման ուղղությամբ:

Մայիսի 7-ին ՀՀ-ում Բելառուսի Հանրապետության արտակարգ և լիազոր դեսպանին

Ամենայն Հայոց Կաթողիկոսն ընդունեց Հայաստանի Հանրապետությունում իր դիվանագիտական առաքելությունն ավարտող Բելառուսի Հանրապետության արտակարգ և լիազոր դեսպան Ալեքսանդր Կոնյուկին: Նորին Սրբությունն իր գնահատանքը հայտ-

նեց դեսպանին Հայաստանում իրականացրած առաքելության համար՝ վստահություն հայտնելով, որ իր հետագա ծառայության մեջ պիտի շարունակի ջանքեր ներդնել համուն հայ-բելառուսական հարաբերությունների առավել զորացման:

Իր հերթին Ալեքսանդր Կոնյուկն անդրադարձավ պաշտոնավարման տարիների իր ջերմ տպավորություններին և հետագա ծրագրերին:



Մայիսի 10-ին Դատավորների եվրոպական միության տարեկան համաժողովի մասնակիցներին

Ամենայն Հայոց Կաթողիկոսն ընդունեց Դատավորների եվրոպական միության (EAJ) տարեկան համաժողովի մասնակիցներին:

ՀՀ դատավորների միության նախագահ Ալեքսանդր Ազարյանը, հայցելով Ամենայն Հայոց Կաթողիկոսի օրհնությունը, ներկայացրեց համաժողովին մասնակից շուրջ 35 եվրոպական երկրից Հայաստան ժամանած պատվիրակներին և տեղեկություններ փոխանցեց համաժողովի աշխատանքների մասին:

Այնուհետև հյուրերին իր հայրապետական օրհնությունն ու պատգամը փոխանցեց Ամենայն Հայոց Կաթողիկոսը՝ ուրախություն հայտնելով Հայաստան և Մայր Աթոռ Սուրբ Էջմիածին նրանց այցի առիթով:

Հայոց Հայրապետն իր խոսքում անդրադարձավ դատավորի կարևոր առաքելությանը՝ աշխարհում արդարության հաստատման, մարդու իրավունքների ու

ազատության պաշտպանության գործում՝ կարևորելով արդարադատության բարոյահենք համակարգի ամրապնդումը: Այս առնչությամբ Վեհափառ Հայրապետը պատգամեց դատավորներին՝ իրենց ծառայության ընթացքում ուղենիշ դարձնել ավետարանական ճշմարտությունը, որ իրական արդարությունը բխում է առ Աստված հավատքից և դրսևորվում է սիրով:

Խոսելով հայ ժողովրդի առջև ծառացած մարտահրավերների մասին՝ Նորին Սրբությունը կարևորեց միջազգային դատական հանրության անդրադարձը բռնի տեղահանված արցախահայերի արդար իրավունքների պաշտպանությանը, Ադրբեջանի կողմից գերեվարված հայորդիների նկատմամբ իրականացվող շինծու դատավարությանը, ինչպես նաև Արցախի հոգևոր, մշակութային ժառանգության ոչնչացման և յուրացման գործողություններին:



Կատարվեց քահանայական ձեռնադրություն

← էջ 1

Սրբազան Հայրը, իր քարոզում անդրադառնալով քահանայության խորհրդին և դիմելով ներկա հավատացյալներին, նշեց. «Այսօր Կանաչ (Աշխարհամատարան) կիրակիին, որը հիշատակն է Քրիստոսի Եկեղեցու հաստատման, Հայոց հոգևոր կենտրոնում՝ Միածնաէջ Մայր Տաճարի սրբազան խորանին կատարեցինք ձեռնադրությունը յոթ սարկավագների: Սա Եկեղեցու պատգամի խորհուրդն է: Եվ ահա, սիրելիներ, Հայաստանյայց Առաքելական Սուրբ Եկեղեցին, համալրվելով յոթ նոր մշակներով, նոր գարուն է ապրում»:

Անդրադարձ կատարելով հոգևոր ծառայության ընթացքում առկա փորձություններին ու դժվարություններին՝ Սրբազան Հայրը պատգամեց չխուսափել դժվարություններից, քանի որ դժվարությունների մեջ են դրսևորվում անձի լավագույն որակները:

Դիմելով նորածն հոգևորականներին՝ Սրբազան Հայրը հորդորեց բոլորանվեր ծառայել Եկեղեցու անդաստանում, հավատարիմ մնալ երանյալ հայրերի սուրբ ավանդներին, ժողովրդին ապրեցնել աստվածադիր պատվիրաններով, որպեսզի հոգևոր արժեքների ծաղկումով մեր ազգը կարողանա կյանքի կոչել իր երազներն ու



իղծերը և կերտել նոր հաղթանակներ. «Ձեր ծառայության մեջ մշտապես ունեցեք մեր Տիրոջ Հիսուս Քրիստոսի օրհնակը՝ բարի վարքով օրինակ ծառայելով մեր ժողովրդին: Հաստատուն և անբեր մնացեք ձեր առաքելության մեջ՝ հավատացյալների կյանքում առատացնելով սիրո, համերաշխության հանդուրժողականության և միաբանության շնորհները: Թող ձեր քահանայագործությունը պողպալից լինի ազգային-եկեղեցական անդաստանում՝ ի գործացում մեր երկրի և ի պայծառություն տիրախման մեր

թեմերի ու Հայաստանյայց Առաքելական Սուրբ Եկեղեցու»:

Ապա «Ողջույնի» ժամանակ Ամենայն Հայոց Հայրապետի գլխավորությամբ Մայր Աթոռի միաբաններն ու ներկա հոգևորականաց դասը բարձրացան Սուրբ Խորան և շնորհավորեցին նորածն քահանաներին՝ համբուրելով նրանց մյուռնոնադրոշմ ճակատներն ու ձեռքերը:

Նույն օրը՝ երեկոյան, Մայր Տաճարում կատարվեց նաև վեղարի տվչության արարողությունը: Տեր Սեպուհ, Տեր Մաղաքիա, Տեր Մխիթար, Տեր Հովսեփ, Տեր

Վազգեն քահանաները ստացան վեղարներ ու համալրեցին Մայր Աթոռ Սուրբ Էջմիածնի միաբանության շարքերը:

Այնուհետև նորածն եկեղեցականներին ընդունեց Ամենայն Հայոց Կաթողիկոսը՝ վերջիններիս փոխանցելով իր հայրական օրհնությունն ու պատգամները:

Նորածն քահանաները Մայր Աթոռ Սուրբ Էջմիածնում կանգնեցին քառասնորյա պատրաստության և աղոթքի շրջան, որից հետո ծառայության կկոչվեն Հայ Եկեղեցու տարբեր կառույցներում և թեմերում:

Նոր նշանակումներ

Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսի հայրապետական տնօրինությամբ կատարվել են Մայր Աթոռ Սուրբ Էջմիածնի միաբանների նշանակումներ:

Հոգեշնորհ Տ. Հարություն վարդապետ Կիրակոսյանը սույն թվականի մայիսի 12-ից նշանակվել է Մայր Աթոռ Սուրբ Էջմիածնի Հայրույթաց տների հոգևոր տեսուչ՝ ազատվելով Լուսարարապետի պաշտոնակատարի պարտականություններից:

Հոգեշնորհ Տ. Անանիա վարդապետ Ծատուրյանը սույն թվականի մայիսի 12-ից նշանակվել է Մայր Աթոռ Սուրբ Էջմիածնի լուսարարապետ՝ ազատվելով ԱՄՆ հայոց Արևմտյան թեմում ստանձնած հոգևոր ծառայությունից:

Հոգեշնորհ Տ. Ռուբեն վարդապետ Զարգարյանը ս. թ. մայիսի 15-ից նշանակվել է Մայր Աթոռ Սուրբ Էջմիածնի եկեղեցական հայեցակարգային բաժնի տնօրեն՝ ազատվելով Քրեակատարողական հիմնարկների հոգևոր տեսչի պարտականություններից:

Հոգեշնորհ Տ. Իսահակ վարդապետ Պողոսյանը ս. թ. մայիսի 15-ից նշանակվել է Մայր Աթոռ Սուրբ Էջմիածնի Քրեակատարողական հիմնարկների հոգևոր տեսուչ՝ ազատվելով Սուրբ Խոր վիրապ վանքի վանահոր պարտականություններից:

Լրատվական նյութերը՝
Մայր Աթոռ Սուրբ Էջմիածնի
տեղեկատվական համակարգի

«Ձեր պատմությունը և ձեր սիրելի ժողովրդի հետ կատարված իրադարձություններն առաջացնում են իմ մեջ հիացմունք և վիշտ»

Ի հիշատակ Ֆրանցիսկո Պապի

Ֆրանցիսկո Պապը (ավագանի անունով՝ խորխե Մարիո Բերգոլիո) Յոթնի Կաթոլիկ Եկեղեցու 266-րդ առաջնորդն էր։ Նրա պապական անունը դրվել է՝ ի պատիվ Ֆրանցիսկյան միաբանության հիմնադիր Ֆրանցիսկ Ասիզեցու։ Նա առաջին ճիզվիտ՝ Յիսուսի միաբանության անդամ պապն էր, առաջինը նաև, որ ընտրվեց Նոր աշխարհից՝ Լատինական Ամերիկայից, Գրիգոր III-ից (7–8-րդ դար) հետո ոչնչորպացի առաջին պապը։

Խորխե Մարիո Բերգոլիոն ծնվել է 1936 թ. դեկտեմբերի 17-ին Արգենտինայի Բուենոս Այրես քաղաքի մոտ գտնվող Ֆլորենս բնակավայրում։ Ծննդաբան ընդունվելուց առաջ աշխատել է որպես և՛ քիմիական տեխնոլոգ, որի ուղղությամբ մասնագիտացած էր, և՛ գիշերային ակումբի դռնապան։ Ծնողները եղել են իտալացի ներգաղթյալ հաշվապահ Մարիո Խոսե Բերգոլիոն և բուենոսայրեսցի տնային տնտեսուհի Ռեգինա Մարիա Սիվոլին։ Խորխեն եղել է ընտանիքի հինգ զավակներից ավագը։ 21 տարեկանում Բերգոլիոն տառապել է կյանքի համար վտանգավոր թոքաբորբով։ Հիվանդությունից հետո նրա թոքի մի մասը հեռացրել են։ Երիտասարդության տարիներին Բերգոլիոն Սան Լորենցո դե Ալմագրո ֆուտբոլային ակումբի երկրպագուներից էր։ Բերգոլիոն նաև Տիտա Մերելլոյի մասնակցությամբ ֆիլմերի, մեռնելիզմի, տանգոյի և Արգենտինայի, Ուրուգվայի ազգային երաժշտության՝ միլոնգայի սիրահար էր։

Հոգևոր կյանք մուտք է գործել 1969 թվականին՝ ձեռնադրվելով քահանա, ապա մշանակվել է Արգենտինայի մայրաքաղաքում գտնվող Սան Միգել քուեջի աստվածաբանական ֆակուլտետի պրոֆեսոր։ 1970-ական թթ. տարբեր պաշտոններ է զբաղեցրել Արգենտինայի ճիզվիտական միաբանությունում։ 1980 թ. նշանակվել է իր Ալմա մատերի՝ Սուրբ Հովսեփի ձեռնարանի ղեկավար և այդ պաշտոնը զբաղեցրել մինչև 1986 թ.։ Գերմանիայում դոկտորական ատենախոսությունը պաշտպանելուց հետո վերադարձել է հայրենիք ու սկսել Կորդովայի արքեպիսկոպոսությունում պաշտոնավարել որպես խոստովանահայր և թեմի հոգևոր տնօրեն։ 1998 թ. դարձել է Բուենոս Այրեսի արքեպիսկոպոս։

Հռոմի Պապ Հովհաննես Պողոս II-ի կողմից Վատիկանում 2001 թ. փետրվարի 21-ին անցկացված Կոնսիստորիումի (Կաթոլիկ Եկեղեցու հոգևոր խորհուրդ) ժամանակ արժանացել է կարդինալական աստիճանի՝ Սուրբ Ռոբերտ Բելլարմինի եկեղեցու տիտղոսով։ Կարդինալը Հռոմի Պապից հետո բարձրագույն տիտղոսն է Կաթոլիկ Եկեղեցու աստիճանակարգում։ Կարդինալի տիտղոսը շնորհում է պապը, իսկ 1179 թվականից, Լաթերանի ժողովի որոշմամբ, կարդինալներն իրենց միջից ընտրում են պապին։

2005 թվականին՝ Հռոմի Պապ Հովհաննես Պողոս II-ի մահից հետո, Բերգոլիոն կանգնեց Վատիկանի պապական կոնկլավին (պապի մահվանից 10 օր հետո հավաքվող կարդինալների հավաք) որպես կարդինալ-ընտրող մասնակցելու համար։ Չնայած Բերգոլիոն դիտարկվում էր որպես պապի հավանական թեկնածու՝ պապաքի,

կոնկլավն այնուամենայնիվ նոր պապ ընտրեց Բենեդիկտոս XVI-ին՝ կարդինալ Յոզեֆ Ռատցինգերին։ Մինչ կոնկլավը կարդինալ Բերգոլիոն մասնակցեց Հովհաննես Պողոս II-ի թաղման արարողությանը և կարդինալների կոլեգիայի հետ զործեց որպես զահապահ՝ կառավարելով պապական աթոռը և Հռոմի Կաթոլիկ Եկեղեցին «Sede Vacante» միջգահական շրջանում (լատ.՝ «թափուր գահի ժամանակ»)։ 2005 թ. նոյեմբերի 8-ին եռամյա ժամկետով գլխավորեց Արգենտինայի եպիսկոպոսների համաժողովը։

Կարդինալ Բերգոլիոն կոչ էր անում հոգևորականներին և աշխարհիկ հավատացյալներին՝ դեմ դուրս գալ վիժումներին ու էվթանազիային՝ ցավերից և տառապանքից ազատելու համար կյանքից զրկելուն։ Նա հաստատակամորեն դեմ էր արտահայտվում նաև 2010 թ. Արգենտինայի կառավարության կողմից հաստատված միասեռ ամուսնությունները թույլատրող օրենսդրությանը։ Բուենոս Այրեսի եկեղեցիներին ուղղված նամակում կարդինալ Բերգոլիոն գրում էր. «Եկեք միասին չլինենք, մենք չենք խոսում սովորական քաղաքական պայքարի մասին, սրանք ավերիչ մղումներ են՝ ընդդեմ Աստծո ծրագրի։ Մենք չենք խոսում սովորական օրինադրի մասին, այլ, ավելի ճիշտ, զեղծարարության՝ ստի հոր մասին, որը ձգտում է մոլորեցնել ու խաբել Աստծո զավակներին»։ 2013 թ. հուլիսին տված հարցազրույցում արդեն որպես պապ՝ հայտարարում է. «Եթե մարդը միասեռական է և ունի բարի կամք և ձգտում է դեպի Աստված, ապա ղվ են ես, որ դատապարտեմ նրան»։ Հղում կատարելով Հռոմի Կաթոլիկ Եկեղեցու դոկտրինին՝ նա նշում է, որ միասեռականները «չպետք է դառնան լուսանցքներ, այլ պետք է ներառվեն հասարակության մեջ»։

Քննադատելով արտամուսնությունից ծնված երեխաներին մկրտել չջանկացող հոգևորականներին՝ կարդինալ եղած ժամանակ նա պնդում էր, որ չամուսնացած մայրերը ճիշտ են վարվել՝ լույս աշխարհ բերելով երեխային, ոչ թե նախընտրելով վիժումը, և եկեղեցին չպետք է երես թեքի նրանցից. «Մեր եկեղեցական միջավայրում կան որոշ հոգևորականներ, որոնք չեն ցանկանում մկրտել միայնակ մայրերի երեխաներին, որովհետև այդ երեխաները չեն ծնվել սուրբ ամուսնությունից։ Դրանք ժամանակակից փարիսեցիներ են։ Նրանք են, ովքեր կղերականացնում են եկեղեցին, նրանք են, ովքեր ուզում են Աստծո ժողովրդին բաժանել փրկությունից։ Իսկ խելձ աղջիկը, որը, երեխային ուղարկողին վերադարձնելու փոխարեն, խիզախություն է ունեցել լույս աշխարհ բերել, ստիպված է մի ծխից մյուսն անցնել, որպեսզի մկրտի նրան»։

Բենեդիկտոս XVI Պապի հրաժարականից հետո՝ 2013 թ. մարտի 13-ին, կոնկլավի կողմից ընտրվեց պապ։ Իր զինանշանի համար Ֆրանցիսկո Պապը կարգախոս հռչակեց «Miserando atque eligendo»՝ «Գթառատ սիրով» տողերը՝ Մատթեոսի Ավետարանից և 7–8-րդ դդ. անգլիացի պատմիչ, աստվածաբան, Կաթոլիկ եկեղեցու սուրբ Բեդա Պատվելու 21-րդ քա-



Ամենայն Հայոց Գարեգին Բ Կաթողիկոսը և Ֆրանցիսկո Պապը Ծիծեռնակաբերդում, 2015 թ.

րոզից, որն ունի հետևյալ բովանդակությունը. «Դա մշանակում է՝ չձգտել երկրային իրերին, չփնտրել վաղանցիկ շահ, խուսափել չնչին մեծարանքից, խոնարհությամբ ընդունել աշխարհի բոլոր քամահրանքները՝ հանուն երկնային հոշակի, օգտակար լինել բոլորին, սիրել վիրավորանքները և ոչ մեկին չհակադարձել, համբերատարությամբ տանել բոլոր ստացված վիրավորանքները, միշտ փնտրել Արարչի փառքը և ոչ երբեք սեփականը։ Ապրել այս ամենի և նմանատիպ այլ բաների հետ՝ մշանակում է զմայ Թրիստոսի հետքերով»։

Ֆրանցիսկո Պապը եղել է շատ հոգատար և համդուրժող տարբեր դավանանքի մարդկանց համդեպ, մշտապես կարևորել է Աստծո ողորմածությունը, հոգացել աղքատների համար։ Իր պաշտոնավարման ընթացքում նա աչքի է ընկել համեստությամբ, պապական իշխանության նկատմամբ քիչ պաշտոնական վերաբերմունքով։ Ի տարբերություն նախորդ պապերի՝ նա նախընտրում էր կրել անպաճույճ եկեղեցական հագուստներ, Վատիկանի առաքելական պալատի պապական հարկաբաժնում մնալու փոխարեն՝ բնակվում էր Վատիկանի Սուրբ Պետրոսի տաճարին կից «Domus Sanctae Marthae» («Սուրբ Մարթայի տուն») հյուրանոցում, իր ընտրության ժամանակ անգամ հրաժարվել է ավանդական պապական մոցցետայից, ոսկե Ձկնորսի մատանու փոխարեն (նաև կոչվում է պապական, հայրապետական կամ սուրբ Պետրոսի մատանի) կրում էր արծաթե մատանին և պահպանում էր կարդինալ ժամանակ կրած լամբախաչը։ Ֆրանցիսկոսը, շեղվելով իր նախորդների վերամբարձ ու ակադեմիական կեցվածքով պաշտոնավարումից, փաստացի գլխավորում էր մի շարժում, որի նպատակն էր՝ առաջնահերթություն տալ կարիքավորներին՝ եկեղեցին կարծես դարձնելով այսպես կոչված «դաշտային հիվանդանոց»։

Հռոմի 266-րդ Պապը սիրված էր հավատացյալների կողմից, բայց նրա պաշտոնավարումը դրամատիկ ու հիասթափեցնող էր պահպանողականների և առաջադեմ խավերի համար։ Ընդդիմախոսների կարծիքով՝ նա բավարար չայլեր չարեց Կաթոլիկ Եկեղեցու ներսում արատավոր բարքերը վերացնելու համար՝ ֆինանսական յուրացումներից մինչև սեռական ոտնձգություններ, թեև հենց նրա պաշտոնավարման օրոք Վատիկանի բանկն իր ողջ պատմության

ընթացքում առաջին անգամ հրապարակեց ֆինանսական գործունեության մասին տարեկան զեկույց։ Ֆրանցիսկոս Պապին հաջողվել է նաև եկեղեցու հազարամյա համակարգում փոփոխություններ մտցնել՝ Վատիկանում բարձր պաշտոններ զբաղեցնելու իրավունք շնորհելով կանանց։ 2016 թվականից ի վեր աստվածաբանական պահպանողականների կողմից Ֆրանցիսկոսի դեմ քննադատությունը սրվել էր։ Ոմանք անհամաձայնության մակարդակ բացատրել են նրանով, որ նա տեսական սկզբունքներից անցել է հովվական ըմբռնման։

Հռոմի Ֆրանցիսկոս Պապը մահացել է 88 տարեկանում՝ ս. թ. ապրիլի 21-ին (Չատկի երկուշաբթի), իր մատաղայրում՝ Վատիկանի Սուրբ Մարթայի տանը։ Մահը վրա է հասել հինգ շաբաթ հիվանդանոցում մնալուց հետո, որտեղ նա բուժվում էր շնչուղիների վարակից և երկկողմանի թոքաբորբից։ 2022 թվականից նա տեղաշարժվում էր անվասայակով՝ ծնկի մշտական ցավի պատճառով, որ վիրահատություն էր պահանջում։

Պապական հուղարկավորությունն ավանդույթով ամրագրված բարդ իրադարձություն էր, բայց Ֆրանցիսկոս Պապի օրոք պարզեցվեցին ծեսերը։ Նա ընտրեց պարզ, ցինկով պատված փայտե դագաղ և իր ցանկության համաձայն՝ հուղարկավորվեց Սանտա Մարիա Մաջորե պապական բազիլիկում, որը Հռոմի չորս գլխավոր տաճարներից մեկն է, իսկ հուղարկավորության ծախսերը հոգաց անհայտ մի բարերար։ Սանտա Մարիա Մաջորեում թաղված է Հռոմի յոթ նախկին քահանայապետ, բայց Ֆրանցիսկոս Պապն առաջինն է հայրուր տարվա ընթացքում, որ ընտրել է Վատիկանից դուրս հուղարկավորման այդ վայրը. այդտեղ թաղված վերջին պապը եղել է Լեո XIII-ը (1903 թ.)։

Ըստ Վատիկանի հաղորդած տեղեկությունների՝ Ֆրանցիսկոս Պապի երկժամյա հուղարկավորության արարողությանը մասնակցել է շուրջ 150 000 մարդ, ներկա են եղել աշխարհի տասնյակ երկրների շուրջ հիսուն առաջնորդ ու պաշտոնյա։ Պապի վերջին հրաժեշտի և հուղարկավորության արարողություններին մասնակցել է նաև Ամենայն Հայոց Կաթողիկոս Գարեգին Երկրորդը՝ Մայր Աթոռի պատվիրակությամբ։

Հռոմի Ֆրանցիսկոս Պապը Հայաստանի և հայ ժողովրդի հանդեպ ունեցել է ջերմ ու ակնածալից

վերաբերմունք։ 2015 թ. ապրիլի 12-ին Վատիկանի Սուրբ Պետրոսի տաճարում Հայոց ցեղասպանության 100-րդ տարելիցի առիթով Ֆրանցիսկոս Պապը մատուցել է Սուրբ Պատարագ և իր ելույթում առանձնանշել, որ հայերին պատահած ողբերգությունը 20-րդ դարի առաջին ցեղասպանությունն է։ 2016 թ. հունիսի 24–26-ը Նորին Սրբություն Ֆրանցիսկոս Սրբազան Քահանայապետն այցելել է Հայաստան։ Այցից առաջ նա հետևյալ ուղեծրն է հղել. «Սիրելի եղբայրներ և բույրեր, մի քանի օր անց ես ձեռնուրախությամբ կլինեմ ձեր մեջ՝ Հայաստանում։ Այս պահից արդեն հրավիրում եմ ձեզ՝ աղոթելու այս առաքելական ճանապարհորդության համար։ Աստծո օգնությամբ գալիս եմ ձեզ մոտ՝ իրականացնելու համար, ինչպես ճանապարհորդության կարգախոսն է ասում, «Այց առաջին քրիստոնյա երկիր»։ Եվ գալիս եմ որպես ուխտագնաց՝ այս հոբելյանական տարում թաթախվելու ձեր ժողովրդի հնագույն իմաստության մեջ և ըմպելու ձեր ժայռե հավատքի աղբյուրից, ինչպես ձեր հայտնի փորագիր խաչքարերն են։ Գալիս եմ դեպի Հայաստանի առեղծվածային բարձունքները՝ որպես եղբայր՝ մղված ձեր դեմքերը տեսնելու ցանկությունից, աղոթելու ձեզ հետ և կիսելու բարեկամության պարզություն։ Ձեր պատմությունը և ձեր սիրելի ժողովրդի հետ կատարված իրադարձություններն առաջացնում են իմ մեջ հիացմունք և վիշտ։ Հիացմունք, քանի որ Յիսուսի խաչի ու ձեր տաղանդավոր մտքի մեջ եք գտել կրկին ողբի կանգնելու ուժը մոլորական ամենասարսափելի տառապանքներից հետո, որ պատմությունը կարող է հիշել։ Վիշտ՝ այն ողբերգությունների համար, որոնք ձեր հայրերը կրել են իրենց մաշկի վրա։ Թույլ չտանք ցավուր հիշողությունների տիրապետել մեր սրտին։ Նույնիսկ չարի շարունակական հարձակումներին չհանձնվենք։ Գործենք, ինչպես Նոյը, որ ջրհեղեղից հետո չհոգնեց դեպի երկինք հայացք մետելուց և մի քանի անգամ աղավմի ուղարկեց, մինչև որ նա վերադարձավ ձիթենու մատուղաշ տերևով։ Դա մշան էր, որ կյանքը կարելի էր վերսկսել, և հույսը պետք է հարություն առնեք.... Թող որ ձեր ժողովրդի մեծանուն սրբերը՝ մասնավորապես եկեղեցու վարդապետ Գրիգոր Նարեկացին, օրհնեն մեր հանդիսները, որոնք սպասում են վառ ցանկությամբ»։

Այցի շրջանակներում Ֆրանցիսկոս Պապը եղել է նաև Ծիծեռնակաբերդում՝ հարգանքի տուրք մատուցելով Հայոց ցեղասպանության զոհերի հիշատակին։ Այնուհետև զրառում է կատարել Հայոց ցեղասպանության թանգարան-ինստիտուտի պատվո այցելումները. «Այստեղ աղոթում եմ՝ ցավը սրտիս մեջ, որ այլևս երբեք նման ողբերգություններ, ինչպիսին սա է, չկրկնվեն, որ մարդկությունը չմոռանա և իմանա չարությանը բարությանը հաղթել։ Թող Աստված պարգևի սիրեցյալ հայ ժողովրդին և ամբողջ աշխարհին խաղաղություն և մխիթարություն։ Աստված պահպանի հայ ժողովրդի հիշողությունը։ Հիշողությունը չի կարելի ռչ պղտորել, ռ՛չ մոռանալ։ Հիշողությունը խաղաղության և ապագայի աղբյուրն է»։ ➡ էջ 4

Կանաչ կիրակի. Եկեղեցու հիմնադրումը Հայաստանում

Սուրբ Զարուբյանը հաջորդող երրորդ կիրակին կոչվում է Աշխարհամատրան կիրակի՝ ի նշանավորումն Երուսաղեմի առաջին եկեղեցու հիմնադրման: *Աշխարհամատրան* բառը կամ *աշխարհամատուռը* նշանակում է աշխարհի առաջին մատուռը՝ Երուսաղեմի եկեղեցին՝ հիմնված առաքյալների կողմից: Տոնի ժողովրդական անվանումը Կանաչ կիրակի է՝ կապված գարնան և բնության վերագարթնքի հետ: Կանաչ կիրակին խորհրդանշում է նաև կյանքի հարությունը:

Հայոց աշխարհում Քրիստոսի դավանանքը քարոզեցին Սուրբ Թադեոս և Սուրբ Բարդուղիմեոս առաքյալները, որոնք և դարձան մեր ազգի առաջին լուսավորիչները՝ ցրելով հեթանոսական կռապաշտ խավարը և տարածելով Քրիստոսի անսպառ լույսը:

Ինչպես հայտնի է, Սուրբ Թադեոս և Սուրբ Բարդուղիմեոս առաքյալները Հիսուս Քրիստոսի տասներկու առաքյալներից էին: Մեր Տիրոջ համբարձումից հետո Նրա առաքյալները շրջեցին աշխարհով մեկ՝ քարոզելու Ավետարանը, և նրանց քարոզչության շնորհիվ շատերը դարձի եկան, զինվորագրվեցին Քրիստոսի բանակին՝ մկրտվելով առաքյալների կողմից: Այդ քարոզչության արդյունքը եղավ Քրիստոնեական առաջին համայնքների ձևավորումը, նրանց հաստատեցին նաև եպիսկոպոսական աթոռներ՝ հավատացյալ ժողովրդի խնամքը վերջիններիս հանձնելով:

Թադեոս առաքյալը Քրիստոսի համբարձումից հետո գնում է Եդեսիա՝ բժշկելու Աբգար թագավորին, որն ազգությամբ հայ էր: Ապա նա մկրտում է տեղի ժողովրդին, Ադդե անունով մետաքսագործին ձեռնադրում իբրև իր հաջորդ, իսկ Աբգար թագավորից հրովարտակ առնելով՝ անենքին Քրիստոսի Ավետարանը քարոզելու, գալիս է նրա քեռորդի Սանատրուկի մոտ, և առաքյալի քարոզչությամբ թագավորն ընդունում է Քրիստոնեություն: Սակայն շուտով, վախենալով իր նախարարների վրեժխնդրությունից, Սանատրուկը հրաժարվում է Քրիստոնեությունից և Շավարշան գավառում (միջնադարում առավել հայտնի էր Արտագ անունով) սպանել տալիս Թադեոս առաքյալին:



Հովնաթան Հովնաթանյան, Ս. Բարդուղիմեոս, Ս. Էջմիածնի գանձատուն, XVIII դ.

Ավանդության համաձայն՝ քարոզչական գործունեությունը և ընդունումը է նահատակ առաքյալի մարմինը: Հետագայում սրբի գերեզմանի վրա կառուցվում է Սուրբ Թադեոս վանքը: Նահատակվում է նաև Սանատրուկ արքայի դուստր Սանդուխտ կույսը, որը հրաժարվել էր Քրիստոնեությունը թողնելու պարտադրանքից: Թադեոս առաքյալը, նախքան նահատակությունը, Հայոց աշխարհի Արտագ գավառում հիմնել էր եպիսկոպոսական աթոռ և Ջաքարիային ձեռնադրել եպիսկոպոս: Նա նաև եպիսկոպոսական աթոռներ էր հիմնել Սյունիքում՝ ձեռնադրելով Եվստաթեոսին:

Թադեոս առաքյալի՝ Մեծ Հայքում քարոզչության ժամանակաշրջանում առաջնության պատճառով Հայոց եկեղեցին համարվել է Սուրբ Թադեոսի առաքելական աթոռ:

Սուրբ Բարդուղիմեոս առաքյալը Հովհաննեսի Ավետարանում հիշատակվում է Նաթանայել անվամբ: Երբ Հիսուս տեսավ իր մոտ եկող Նաթանայելին, նրա մասին ասաց. «Ահա իսկական մի իսրայելացի,


որի մեջ նեմգություն չկա» (Հովհ. 1:47): Եվ հենց Բարդուղիմեոսն էր, որ առաջինը Տիրոջն անվանեց Աստծու Որդի. «Ռաբբի, Դու ես Աստծու Որդին, Դու ես Իսրայելի թագավորը» (Հովհ. 1:49):

Բարդուղիմեոս առաքյալը Հայաստան քարոզելու է եկել Թադեոս առաքյալից հետո: Արտաշատ գնալիս նա մերձակա բլրի վրա՝ Օթյաց խաչ կոչված վայրում, հանդիպում է Թադեոս առաքյալին: Հանդիպումից հետո Թադեոսը վերադառնում է Վասպուրական և Արտագ, իսկ Բարդուղիմեոսը՝ Հեր և Ջարևանդ, այնուհետև՝ Անձևացյաց գավառ և Աղբակ: Այստեղ նրա քարոզչության շնորհիվ Քրիստոնյա են դառնում Սանատրուկ արքայի քույրը՝ Ոգուհին, և Տերենտիոս հազարապետը: Արքայի հրամանով ձերբակալում են առաքյալին, արքայաքրոջն ու հազարապետին և բերում արքունիք: Երկարատև հարցաքննությունից հետո նրանք հրաժարվում են թողնել առ Քրիստոս հավատը: Բարդուղիմեոս առաքյալը նահատակվում է փշոտ բույսերի հարվածներից, իսկ արքայաքրոջը և հազարապետին սրակոտոր են անում:

Ավանդության համաձայն՝ Բարդուղիմեոս առաքյալը մորթագետն է արվել: Առաքյալը նահատակվել է Վասպուրական նահանգի Աղբակ գավառում: Հետագայում նրա գերեզմանի վրա կառուցվել է Սուրբ Բարդուղիմեոս վանքը:

2015 թվականից, Ն. Օ. Ս. Ս. Տ. Գարեգին Երկրորդ Ամենայն Հայոց Կաթողիկոսի սրբատառ կոնդակով, Սուրբ Թադեոս և Սուրբ Բարդուղիմեոս առաքյալների հիշատակության օրը հռչակվել է Աստվածամուկ Սուրբ Գեղարդի ուխտի օր: Տոնի օրը Միածնաէջ Մայր Տաճարում մատուցվում է Սուրբ Պատարագ, որի ընթացքում Ամենայն Հայոց Հայրապետը Սուրբ Գեղարդը եկեղեցական հանդիսավոր թափորով և ավետաբեր գանգերի հնչյունների ներքո բերում է Մայր Տաճար:

Սուրբ Գեղարդը, ինչպես հայտնի է, այն միգակի սայրն է, որով հռոմեացի զինվորը խոցեց խաչին գանձված մեր Տիրոջը. «Զինվորներից մեկը տեգով խոցեց Նրա կողմը, և իսկույն արյուն ու ջուր ելավ» (Հովհ. 19:34): Ըստ եկեղեցական ավանդության՝ Սուրբ Գեղարդը Քրիստոսի համբարձումից հե-



Անտոնիս վան Դելք, Սուրբ Թադեոս, 1619—1621 թթ.

տո Հայոց աշխարհ է բերել Սուրբ Թադեոս առաքյալը: Հայոց Սանատրուկ թագավորի մոտ՝ Արտագ գնալիս, Տարոնի ճանապարհին, Սուրբ Հոգու թելադրմամբ առաքյալը եղրդենու տակ պահում է Աստվածամուկ Գեղարդը ու յուղով լի սրվակը: Սուրբ Գեղարդի միջոցով այդտեղ աղբյուր է բխեցնում, այնուհետև շարունակում է ճանապարհը դեպի Արտագ, ուր և նահատակվում է:

Սուրբ Գեղարդն ու յուղով լի սրվակը եղրդենու տակ պահված են մնում մինչև հայոց դարձը: Երբ Սուրբ Գրիգոր Լուսավորիչը Կեսարիայից կաթողիկոսական օծում ստանալուց հետո վերադառնում է Հայաստան, Տարոնում հիմնում է Մշո Սուրբ Կարապետ վանքը: Գրիգոր Լուսավորիչը տեսնում է մի լույս, որը կամարածն իջնում է այնտեղ, ուր եղրդենու տակ ամփոփված էին յուղի սրվակն ու Սուրբ Գեղարդը:

Սուրբ Գեղարդը դարձել էր շարունակ պահվել է պատմական Հայաստանի տարբեր վանքերում: 13-րդ դարում այն Պռոշյան իշխանական տան սեփականությունն էր: Երկար ժամանակ էլ պահվում էր Այրիվանքում (Գեղարդավանք): 18-րդ դարի երկրորդ կեսին Սուրբ Գեղարդը բերվել է Մայր Աթոռ Սուրբ Էջմիածին և մինչև օրս համայն հայության հոգևոր կենտրոնում է:

Աստվածամուկ Սուրբ Գեղարդն ունի բժշկող գործություն: Սուրբ Գեղարդի հրաշագործությունների նկատմամբ հավատ են ունեցել ոչ միայն հայերը, այլև օտարազգիները՝ վրացիները, մահմեդական-

ներ և այլն, ու մեծամեծ դժբախտությունների ժամանակ միշտ դիմել են նրա հրաշագործ գործությանը: 1797 թ., երբ Թիֆլիսում մոլեզմուն էր ժամտախտը, վրաց Գեորգի թագավորը խնդրանքով դիմել է Ղուկաս Ա Կարեցի Հայրապետին՝ Գեղարդը Թիֆլիս տանելու թույլտվությամբ: Հայոց Հայրապետն ընդառաջում է վրաց թագավորի խնդրանքին և Գեղարդն ուղարկում Թիֆլիս: Ժամտախտը շուտով վերանում է: Հավատալով Գեղարդի հրաշագործ գործությանը՝ վրաց թագավորն ուղում էր ընդմիջտ սեփականացնել այն և տարիներ շարունակ չէր վերադարձնում: Ի վերջո այն Էջմիածին վերադարձվեց մեծ ջանքերի գնով: Դա է պատճառը, որ երբ 1830 թ. ամռանը Թիֆլիսում բռնկված ժամտախտի ժամանակ թիֆլիսահայ համայնքը թախանձազին դիմեց Եփրեմ Ա Չորագեղցի Կաթողիկոսին՝ ժամտախտի դեմ պայքարելու արդեն փորձված միջոց Սուրբ Գեղարդն այնտեղ ուղարկելու, Կաթողիկոսը մերժողական պատասխան ուղարկեց:

1846—1847 թթ., երբ ժամտախտը կրկնվեց Անդրկովկասում, առիթ եղավ մորից խնդրելու Գեղարդը: Անդրկովկասի քաղաքական վարչության պետ գեներալ Լադիսկին 1846 թ. մարտի 2-ին նամակ-խմբագրությամբ դիմեց Ներսես Ե Աշատարակեցի Կաթողիկոսին, որ Գեղարդը Էջմիածնից դուրս բերվի: Ի պատասխան նամակի՝ Վեհափառ Սուրբ Գեղարդը եպիսկոպոսների ու վարդապետների ուղեկցությամբ 1846 թ. պատեցնում է Նախիջևանի և Երևանի գավառների գյուղերում, ապա 1847 թ. այն տարվում է Թիֆլիս ու նույն տարում էլ վերադարձվում Սուրբ Էջմիածին (տես Ի. Ղարիբյան, Հրաշագործ Սուրբ Գեղարդ, Երևան, 2003):


Հայոց եկեղեցին Սուրբ Թադեոս և Սուրբ Բարդուղիմեոս առաքյալների հիշատակությունը կատարում է Հիսնակաց պահեղ երկրորդ կիրակիի նախորդ օրը՝ շաբաթ: Թադեոս առաքյալին նվիրված հիշատակության մեկ օր ևս կա՝ Սուրբ Սանդուխտ կույսի հետ, որ մշվում է Պայծառակերպության տոնի հաջորդ շաբաթ օրը:

Մարիամ ՀԱՐՈՒԹՅՈՒՆՅԱՆ
Արամայիս սրկ. ԱՁԻՉՅԱՆ

Ի հիշատակ Ֆրանցիսկոս Պապի

← էջ 3

Չնայած Ֆրանցիսկոս Պապի և Վատիկանի՝ Հայաստանի և հայ ժողովրդի հանդեպ ունեցած ջերմ վերաբերմունքին՝ վերջերս հայության համար տարակուսանքի և խորին անհանգստության պատճառ դարձավ երկու իրողությունը. մախ՝ Վատիկանի «L'Osservatore Romano» պաշտոնական պարբերականում 2024 թ. հուլիսին հրատարակվեց «Քրիստոնեության ակունքներն Ադրբեջանում. ալբանական առաքելական եկեղեցու հետքերով» վերտառությամբ հակազիտական հոդված, ուր Դադիվանքը, Գանձասարը և Խաթրավանքը համարվում էին ոչհայկական, ապա՝ Վատիկանում Սուրբ Աթոռի հայրապետական Գրիգորյան համալսարանում, ս. թ. ապրիլի 10-ին Ադրբեջանի ԱԳՆ-ի կողմից կազմակերպվեց միջազգային գիտաժողով՝ «Քրիստոնեությունը



Ֆրանցիսկոս Պապը 2015 թ. ապրիլի 12-ին՝ Վատիկանի Սուրբ Պետրոսի տաճարում Հայոց ցեղասպանության 100-րդ տարելիցին նվիրված պատարագի ժամանակ, տեղի ունեցած ընդորոշեց «ցեղասպանություն» եզրույթով:

Ադրբեջանում. պատմություն և արդի ժամանակներ» խորագրով, որը դարձյալ նպատակաուղղված էր

Արցախի հայկական կրոնական ու մշակութային ժառանգությունն աղբրեզանական ներկայացնելուն՝

փաստացի հերքելով հայերի ներկայությունը տարածաշրջանում: Համաժողովի ելույթներում Արցախի մի շարք վանքեր ու եկեղեցիներ, այդ թվում՝ Դադիվանքի վանական համալիրը, ներկայացվել են որպես «հնագույն կովկասյան ալբանական մշակույթի ժառանգություն»: Սա Ադրբեջանի կողմից տարիներ շարունակ տարվող քաղաքականության հետևանք է, և խիստ դատապարտելի են գիտության անվան տակ պատմության կեղծումը, վերաշարադրումն ու քաղաքական մպատակներով օգտագործումը: Ադրբեջանական կեղծ թեզերը ներկայացրել են Թուրքիայից, Ղազախստանից, Ուզբեկստանից, Հարավային Կորեայից, Ռուսաստանից, Լեհաստանից, Իտալիայից, Վրաստանից, Գերմանիայից, Ֆրանսիայից, Կանադայից, ԱՄՆ-ից, Լիտվայից ժամանած գիտնականներ: Ի պատասխան Մայր Աթոռ

պաշտոնական դատապարտման՝ Գրիգորյան համալսարանի ղեկավարությունը կատարված վերաբերյալ տեղեկացրել է, որ համալսարանը որևէ ներգրավվածություն չի ունեցել միջոցառման կազմակերպման գործում և ոչ էլ հովանավորություն է իրականացրել, պարզապես «լսարանային տարածք է վարձակալությամբ տրամադրել»:

Նշենք, որ շատ սերտ են Բաքվի և Վատիկանի փոխհարաբերությունները: Տակավին 2020 թ. Ադրբեջանի նախագահ Իլհամ Ալիևը և նրա տիկինը Վատիկանում Ֆրանցիսկոս Պապի կողմից ընդունվել են որպես հատուկ հյուրեր: Այդ ընթացքում Մեհրիբանը պարզապես չէր նաև աշխարհիկ անձանց համար պապական ամենաբարձր պարգևով՝ Պիոս IX-ի շքանշանով:

ՕՖԵԼՅԱ ԳԱՄՊՐՅԱՆ

Կարմիր կիրակի

Նիսուս Քրիստոսի հրաշափառ Զարության տոնին հաջորդող վեց կիրակիները կոչվում են Զինանց կիրակիներ կամ Գունագեղ կիրակիներ։ Այդ կիրակիները Սուրբ Զատիկի տոնին հաջորդող հիսուն օրվա հոգևոր ուրախության շրջանն են, որոնք շարունակում են Սուրբ Զարության վայելքն ու խորհուրդը։ Առաջին կիրակին Կրկնազատիկն է, որին հաջորդում են Սպիտակ, Կանաչ, Կարմիր, Լուսապայծառ և Կապույտ կիրակիները։ Յուրաքանչյուր կիրակիի անվան խորհրդաբանության հիմքում առկա գույնը գարնան իմաստաբանական մի երանգ է։ Շնորհք Պատրիարքը, նկատի ունենալով այս հոգևոր ու առարկայական բազմերանգությունը, գրում է. «....Չկա մեկը, որ չհափշտակվի ծիածանի կամարով, չկա մեկը, որ կանգ չառնի և լուռ հիացնումքով կամ հրճվագին բացականչությամբ չդիտի դաշտերի մեջ հյուսված ծաղիկների գարնանային գույնզգույն կամ միագույն գորգերը։ Վերջապես չկա աչք ունեցող հողեղեն մի էակ, որ չհրապուրվի արշալույսի կամ վերջալույսի գույների խաղերով» (Շնորհք Պատրիարք Գալուստյան, Մեծ Պահքի կիրակիների ոսկե շղթան, Գունագեղ կիրակիներ և Դոգեգալուստ, Ս. Էջմիածին, 2011, էջ 133)։

Զինանց չորրորդ կիրակին Կարմիր կիրակին է, որն ունի մի քանի խորհուրդ և մեկնություն։ Ժողովրդի շրջանում այն համարվել է նահատակաց կամ սրբոց կիրակի։ Մեկ այլ բացատրությամբ` կարմիրը խորհրդանշում է Քրիստոսի կենարար արյունը` հեղված հանուն մարդկության մեղքերի քավության, և Նրա արյամբ հաստատված եկեղեցին։ Այն նաև խորհրդանիշն է բոլոր մարտիրոսների արյան, որոնք նահատակվել են Քրիստոսի և քրիստոնեական հավատքի համար։

Քրիստոնեության մեջ կարմիրն առհասարակ պայքարի խորհուրդն ունի։ Բոլոր ժամանակների ռազմական մեծագույն հեղափոխությունները որպես խորհրդանշան են ունեցել կարմիր գույնը։ Պատահական չէ նաև, որ քրիստոնեությունն իր Զարուցյալ Փրկչին

պատկերել է կարմիր ձորձով և Նրա ձեռքին` կարմիր դրոշ` խաչի նշանով (Շնորհք Պատրիարք Գալուստյան, Մեծ Պահքի կիրակիների ոսկե շղթան...., էջ 157)։ Իսկ Եսայի մարգարեն կարմիրը համարել է հաղթանակի գույն. «Ո՛վ է սա, որ սուրալով է գալիս եղովմից, որի զգեստները բոսորի կարմրությունն ունեն, գեղեցիկ պատմուճանով և հուժկու զորությամբ.... Ինչո՞ւ կարմիր են զգեստներդ հնձանահարի հանդերձների նման» (Եսայի ԿԳ։1–2)։

Մեզանից յուրաքանչյուրը բազմապիսի փորձությունների և պայքարի միջով է անցնում` սեփական գոյությունը երկրային կյանքում պահելու համար։ Սակայն ռՐն է պայքարը, որ մարդը մղում է քրիստոնեական արածքում։ Արտաքուստ շատերին կարող է թվալ, որ քրիստոնյան միայն Ավետարան է կարդում և գնում եկեղեցի։ Սակայն այդ պայքարն ունի ավելի խոր արմատներ։ Սուրբ Մկրտության և Դրոշմի խորհրդով մարդը դառնում է քրիստոնյա, մուտք գործում հոգևոր նոր կյանք, որտեղ արդեն պետք է պայքարի չար, ապաբարոյական, այլասերիչ ուժերի դեմ, որոնք կարող են տանել դեպի կործանում։ Իրական քրիստոնյան պետք է պատրաստ լինի պահելու բոլոր բարոյական և հոգևոր չափանիշները, պետք է լինի քաջ զինվոր, որն անգամ սեփական կյանքի գնով կարող է պաշտպանել իր հավատը։ Նա պետք է հրաժարվի բնազդական նախասիրություններից, նախկին կյանքի ապականիչ հակումներից և մոլություններից։ Այդ պայքարը բնավ էլ հեշտ չէ, պետք է դրսևորել ուժեղ կամք և տոկոսություն` այդ ամենին հասնելու համար։ Այսինքն` միայն ուժեղներին է պայքարը հասու։ Սակայն Պողոս առաքյալն ասում է. «Աստծո` «տկարը» ավելի հզոր է, քան մարդկանց կողմից «գորավոր» նկատվածները» (Ա Կորնթ. Ա։26–27)։ Իսկ Շնորհք Պատրիարքը նկատում է. «Երբեմն ուժի ինչպիսի առատ աղբյուրներ կան ըստ աշխարհի` տկար մարդկանց մեջ, և ինչ քայքայիչ տկարություն` զորավոր նկատված մարդկանց մեջ» (Շնորհք Պատրիարք Գալուս-

տյան, Մեծ Պահքի կիրակիների..., էջ 160)։ Սրանով հասկանում ենք, որ յուրաքանչյուր մարդ կարող է ունենալ թուլություններ, բացասական հակումներ և սովորություններ, սակայն քրիստոնեության համար հարկավոր է ունենալ քաջություն և հրաժարվել չարից, կեղծիքից, ստից, անարդարությունից, բանասարկությունից և այն ամենից, ինչը կարող է մարել հոգևոր լույսը։ Այդ քաջությունն իր մեջ կարող է գտնել ամեն ոք` հանուն քրիստոնեական հավատքի և աստվածային սիրո։ Ինչպես բնությունն է ծաղկում ձմռան ցրտից և բազմաթիվ փորձություններ հաղթահարելուց հետո, այնպես էլ մարդկային կյանքն է ծաղկում Աստծու սիրո և Նրա հավատքի շնորհիվ։ Եվ, ի վերջո, կարմիրը մեր Փրկչի հեղած արյունն է, որով Նա ուղեմշեց այն «անձուկ ու նեղ ճանապարհը», որ յուրաքանչյուր քրիստոնյայի` իրական քրիստոնյայի, պետք է տանի դեպի հավիտենական կյանք, դեպի արդարության պսակ։

Կարմիր կիրակին ինքնահատուկ ոչ մի շարական չունի, որևէ հատուկ արարողություն բնորոշ չէ նրան, և չի տարբերվում մյուս կիրակիներից։ Սակայն որոշ եկեղեցիներում պատարագչի զգեստը, եկեղեցու վարագույրն ու զարդարանքը, դպիրների և սպասավորների շապիկները օրվան համապատասխան` կարմիր են լինում։ Զատկանշական է, որ Զինանց կիրակիներիս ամբողջությամբ կարդացվում են չորս Ավետարանները` Զիսուսի Շննդյան և Չարչարանքների դրվագներից բացի, ողջ «Գործք Առաքելոց»-ը և յոթ ընդհանրական նամակները` որպես Ս. Պատարագի ճաշու ընթերցումներ։

Գունագեղ կիրակիներն իրենց ուրույն ազդեցությունն են ունեցել հատկապես ժողովրդական սովորույթների և կյանքի վրա։ Որպես առատության և արգասավորության խորհրդանիշ` հարսանիքների ժամանակ փեսայի վրա կապում էին կանաչ և կարմիր ժապավեններ։ Նարոտի թագի փոխարեն կարմիր ու կանաչ էին օգտագործում։ Այդ օրերին մարդիկ ուխտագնացություն-

Ահարոնյան քահանայության հաստատումը. քահանայական զգեստներ և ձեռնադրություն

«Դուք կլինեք ինձ համար քահանաների թագավորություն և սուրբ ազգ։ Այս ամենը հաղորդիր Իսրայելի որդիներին»
(Ելք 19:6)։

Քահանայությունը Զին Մերձավոր Արևելքում

Քահանայությունը` իբրև պաշտոն, տարածված է եղել Մերձավոր Արևելքի գրեթե բոլոր ժողովուրդների կրոնական համակարգերում։ Քահանաները պատասխանատու էին տաճարներում ծառայելու, զոհաբերություններ կատարելու և պաշտամունքային արարողությունների ընթացքում հասարակ ժողովրդին առաջնորդելու համար։ Այս պաշտոնն ստանձնելու նպատակով նրանք պատրաստվում էին դեռևս վաղ տարիքից, սակայն որոշ դեպքերում այն կարող էր լինել նաև ժառանգական։ Պաշտամունքի բաղկացուցիչ մաս էին հատկապես ծիսական զոհաբերությունները, որոնք կարևոր նշանակություն են ունեցել տարբեր ժողովուրդների կյանքում։ Դրանք զանազան իմաստներ ու նպատակներ են հետապնդել` սկսած որևէ աստվածության հաճոյանալու համար կերակուր մատուցելու պարզ ցանկությունից մինչև երախտագիտության կամ նվիրվածության մեծագույն զգացումի ցուցաբերում։

Իսրայելի հարևան տարածքներում, այդ թվում` Եգիպտոսում և Միջագետքում, որպես քահանաներ` սովորաբար հանդես էին գա-

լիս թագավորները` շատ հաճախ նաև գլխավորելով քահանայական դասը։ Նահապետական շրջանում, ի տարբերություն այլ ազգերի, հրեա ժողովրդի կյանքում քահանայական հատուկ պաշտոն գոյություն չուներ, և նահապետներն իրենք էին իրականացնում այնպիսի կարևոր գործառույթներ, որոնք բնորոշ էին քահանաներին (ՇՆՈդ. 8:20, 12:7, 13:4, 26:25)։ Նահապետական վարչաձևում կրոնական առաջնորդությունը նույնացվում էր քաղաքականի հետ։ Նահապետը գործում էր` որպես ժողովրդի ընդհանուր նախահայր, դատավոր և կրոնական առաջնորդ։ Արդեն իսկ ահարոնյան քահանայության հաստատմամբ այս ամենն ավելի կարգավոր տեսք ստացավ. քահանաների հիմնական գործառույթը, ծիսական զոհաբերություններ կատարելուց զատ, դարձավ Աստծո և մարդկանց միջև միջնորդ և Աստծո ժողովրդի ուսուցիչ ու դաստիարակ լինելը։ Այս ամենը նրանց առանձնացնում էր ժողովրդի մնացյալ հատվածից։

Վկայության խորանին առնչվող կարգադրությունների հետ իբրև պաշտամունքային աստվածադիր կարգերի անբաժանելի մաս` ձևավորվեց Ահարոնյան քահանայությունը։ Այսպես, Ելից գրքի 25:1–27:19 և 27:20–30:10 տեղիները բովանդակային առումով իրար համապատասխանող հատվածներ են, որոնցից առաջինը հիմնվում է մարդկանց բարի կամքի դրսևորման վրա, այն է` Վկայության խորան կառուցելու

մասին միայն ակնարկելը կամ այդ գաղափարը հաղորդելը բավարար է, որ մնացյալ ամեն բան հրեա ժողովուրդը ձեռնարկի ինքնուրույն, իսկ երկրորդում, ի տարբերություն առաջինի, Աստծո կողմից արդեն իսկ տրվում են հստակ հրահանգներ Վկայության խորանի կառուցման վերաբերյալ։ Առաջին հատվածում այն նախատեսված է այնպիսի մարդկանց համար, որոնք Աստծո հետ անմիջական շփման մեջ են (օրինակ` Մովսեսը), իսկ երկրորդում գործող և գլխավոր հերոսներ են դառնում քահանաները։ Դետաքքրական է, որ վերոնշյալ հատվածներում Մովսեսի անունը իիշատակվում է միայն մեկ անգամ` 25-րդ գլխի առաջին համարում. *«Տերը Մովսեսին ասաց»*։ Այդուհետ գլխավոր դերում հանդես պիտի գա նրա եղբայր Ահարոնը։ 27-րդ գլխում տեսնում ենք, որ Աստված խոսում է հրամայական տոնով` Վկայության խորանի վերաբերյալ ասելով. *«Պատվիրիր Իսրայելի որդիներին, որ քեզ ձիթեմու զուլալ, անարատ, ծեծած ձիթապտղի ձեթ բերեն լույսի համար, որպեսզի մշտավառ ճրագ լինի»* (Ելք 27:20)։ Իսկ ռՐն է հրահանգ տալու պատճառը, ի՞նչ է տեղի ունեցել այս ընթացքում. մարդիկ բարի կամք չդրսևորեցին, չնախաձեռնեցին սեփական ցանկությամբ պատրաստելու Վկայության խորանը, բայց եթե նրանց տրվի հստակ կարգադրություն, նրանք հնազանդորեն կանեն այդ։

Վկայության խորանի կառուցման վերաբերյալ կարգադրություններ տալուց հետո Աստված պատվիրում է Մովսեսին. *«Դու Իսրայելի որդիներից քեզ մոտ կերես քո եղբայր Ահարոնին, նրա հետ նաև նրա որդիներին, որ ինձ համար քահանայություն անեն Ահարոնը և նրա որդիներ Նադաբը, Աբիուդը, Եղիազարն ու Իթամարը»* (Ելք 28:1)։ Դետաքքրական է, որ եբրայերեն բնագրում *«ինձ համար քահանայություն անեն»* արտահայտությունը դրված է եզակի թվով` *«ինձ համար քահանայություն անի»*, ինչը, ըստ մեկնիչների, այս դեպքում վերաբերում է միայն Ահարոնին. նրա որդիները հնարավորություն են ստանում` ծառայելու Վկայության խորանում միայն իրենց հոր արժանիքների համար։ Ահարոնը և նրա որդիները սերում էին Ղևիի ցեղից։ Վերջինս սահմանվում է իբրև կրոնական պարտականությունների համար պատասխանատու ցեղ։

Քահանայական զգեստներ։ Դրանց կարևորությունը և նշանակությունը

Այս ամենին հաջորդում է Աստծո կողմից տրված մեկ այլ կարգադրություն, որ վերաբերում է Ահարոնի և նրա որդիների քահանայական զգեստներին։ Աստված այսպես է պատվիրում Մովսեսին. *«Սրբազան զգեստներ թող պատրաստեն քո եղբայր Ահարոնի ու նրա որդիների համար, որպեսզի ինձ համար քահանայություն անեն»* (Ելք 28:4)։ Ինչո՞ւ են անհրաժեշտ քահանայական զգեստները, և, առհասարակ, ինչո՞ւ է ան-

ցեր էին կազմակերպում մեծ շուքով և պատասխանատվությամբ։ Նախապես պատրաստում էին բազմապիսի և տարատեսակ ուտեստներ, հատուկ հագուստներ ընտրում, զբոսանքներ կազմակերպում, որոնք ուղեկցվում էին ուրախ երգ ու պարով։ Ժամանակին հեռավոր վայրերում ապրողներն օրեր առաջ էին գալիս, որ հասցնեին մասնակցել ուխտագնացությանը։ Ուխտավայրերում այդ օրերին բազմաթիվ հին վեճեր էին լուծվում, նոր կապեր և բարեկամություններ էին հաստատվում, աղջկատեսություններ, խնամատեսություններ և նշանախոսություններ էին կատարվում։ Ընդունված են եղել նաև բազմաթիվ խաղեր` հավկթախաղը, վեզախաղը, չլիկ դաստան և այլն։

Այսօր էլ որոշ բնակավայրերում այս ավանդույթները որոշակի փոփոխություններով պահպանվել են։ Կանաչ և Կարմիր կիրակիների սիրված ուխտավայր է համարվում Կոտայքի մարզի Սուրբ Պողոս-Պետրոս եկեղեցին։

Դայոց եկեղեցին այս տարի Կարմիր կիրակին տոնեց մայիսի 11-ին։ Շուրջ հինգ տարի է, ինչ ավանդույթ է դարձել, որ այդ օրերին Արագածոտնի թեմի Սուրբ Դովհանմավանք է տարվում Մշո Սուրբ Առաքելոց վանքի Կարմիր Ավետարանը, որը պատկանում է երևանաբնակ Կարապետյանների ընտանիքին, և այդ օրը մատուցվում է Սուրբ և Անմահ Պատարագ։ Սա այն Ավետարանն է, որի վրա Անդրանիկ Ջորավարն ու նրա զորքը երդվել են կյանքի գնով պաշտպանել հայրենիքը։ Եվ նրանց օրինակով մեզանից յուրաքանչյուրը պետք է պատրաստ լինի պաշտպանել մեր հայրենիքն ու հավատը։

Զինանց կիրակիների լուսապայծառ գույները հարկավոր են յուրաքանչյուր քրիստոնյայի, որ Աստծո հանդեպ սերն ու հավատը առավել գունեղ ու հրաշագեղ դարձնեն։ Քրիստոնեությանը հարկավոր են գույներ...

Լիլիթ ԿԱՐԱՊԵՏՅԱՆ

ԴԱՍԸ ՀՈԳԵՎՈՐԱԿԱՆՆԵՐ: ՊԱՏՄՈՒԹՅՈՒՆ ԵՎ ԱՐԴԻԱԿԱՆՈՒԹՅՈՒՆ

«Գեղարվեստն էլ ունի իր փարդապետությունը», կամ՝ «Ամեն բան անցողիկ է, մնայուն է գեթ արժեքը, որը փշրանքն է կատարելության»

Հարցազրույց Տ. Իսահակ վրդ. Պողոսյանի հետ


— Հայր Սուրբ, Ձեր գրական ճանապարհն սկսեցիք չափաժողով. բանաստեղծական մի շարք ժողովածուների հեղինակ եք, այնուհետև արձակը կարծես գերիշխող դարձավ: Բանաստեղծություններում և պոեմներում էլ արդեն իսկ նկատելի էր էպիկական շունչը: Ո՞րն է Ձեր նախընտրած ժանրը, որը Ձեզ լիարժեք ինքնարտահայտվելու հնարավորություն է տալիս:

— Անկեղծորեն պետք է ասեմ, որ բանաստեղծական ոճն ինձ չափազանց հոգեհարազատ է՝ գուցե նաև այն պատճառով, որ նախապես այդ ժանրով եմ ստեղծագործել, բայցև ակնառու է, որ հատկապես վերջին շրջանում արձակում էլ ինձ բավական «լավ եմ զգում ու պատկերացում», թեև, հայելով նաև մեծերի անցած ուղիում, գիտեմ, որ տակավին բավական ճանապարհ կա անցնելու: Այդուհանդերձ, պետք է փաստեմ, որ ես նախ՝ հոգևորական եմ, համաժամանակ՝ մտածող և ստեղծագործող: Գրեթե բոլոր հայտնի ժանրերն ինձ հոգեհարազատ են և ծառայում են միևնույն նպատակին, քանի դեռ միտքը՝ աշխարհի բոլոր լեզուներով խոսող, մարդկության մշտական ուղեկիցն է, իսկ հաղթությունը՝ բոլոր տառապյալ ազգերի ու ազատ հոգիների նպատակակետը: Այս իմաստով ես բնավ երկփեղկված չեմ, մշտապես բաց և ինքնուրույն եմ և հակառակ ամեն տեսակ հիասթափությունների ու դժվարությունների՝ լավատես եմ, իմ համոզմունքներով էլ՝ անբեկանելի: Որովհետև, ինչպես կյանքն է փաստում, դժվարությունները նաև ելքեր են առաջ բերում, դրանց հաղթահարումը՝ մարդկայնություն և հոգեկան բավականություն: Այդուհանդերձ, ինչպես Շիրվանզադեն է ասում, «չկա կյանքից ավելի գեղեցիկ բան»...

— Վերջին երկու տարվա ընթացքում հրատարակել եք պատմական վիպակներ՝ «Հայրապետը», «Գրիգոր Մագիստրոս»: Պատմականն է գերիշխում Ձեր երկու ստեղծագործություններում. ազգային խնդիրների վերհանումը, պատմական երևակայությունը, շարադրանքի եղանակը, ոճն ու բառազանձը այդ մասին են խոսում: Պատմությունն է Ձեզ առավելապես հետաքրքրում, թե՞ դա միջոց է գլխավոր կերպարների՝ Ներսես Շնորհալու և Գրիգոր Մագիստրոսի կյանքը պատկերելու:

— Պետք է հավելեմ, որ վերջին շրջանում կյանքի եմ կոչվել նաև «Պատմագեղարվեստական ակնարկները» և մի շարք թարգմանությունների վերահրատարակություններ: Ընդհանրապես, պատմությունը, իրողությունը լինելուց զատ, միջոց և հնարավորություն է՝ մասնահատուկ անդրադարձով վեր հանելու անցյալի կարևոր փաստերն ու վավերագրերը: Հ. Սահյանն ասում է, որ պատմությունն անցյալը վերաթմայնացնելու այն կերպն է, որը համաժամանակ մարդուն վերահաստատում է իր կոչման մեջ: Պ. Սևակը պատմությունը բնորոշում է վեհի ու վսեմի ջատագովություն, իսկ Ավ. Իսահակյանն իրավաբանական և անկեղծ մերժանքներ: Ասում է. «Մարդն այնքան մեծ է, որքան մեծ են նրա երազները»:

Փաստելի է, որ մտածող մարդը կրկնակի և անգամ բազմակի կյանք է ապրում: Կարող ենք արձանագրել, որ



միաժամանակ և՛ ստեղծագործություն, և՛ պատմություն է նաև Աստծու և մարդու հարաբերությունը: Իսկ ավելի ամբողջական՝ անցյալի համակեցությունը ներկայի մեջ այն հոգևոր ապրումն է, որը մեծապես պայմանավորվում է հիշողությամբ: Այս սկզբունքը հատկապես տեսանելի է Ս. Լուսավորիչ և Սահակ Պարթև հայրապետների և մանավանդ եռամեծ վարդապետ և հայոց գրերի հեղինակ Մեսրոպ Մաշտոցի դեպքում: Արվեստը կամ գեղարվեստը մի դեպքում՝ ավանդույթների, մյուս դեպքում՝ խորհուրդների կամ իրերի ներքին բովանդակությամբ, մի այլ դեպքում՝ լուսավորության կամ մերդաշնակության, իսկ իբրև կանոն՝ ձևի և բովանդակության համերաշխ, ներդաշնակ պատկերագրումն է կամ բյուրեղացումը: Այս ճանապարհին ամենքը՝ ներառյալ ստեղծագործողը, միջոց են՝ գեղեցիկը որոնելու և ներկայացնելու համար:

— Ինչպե՞ս եք լուծում գլխավոր կերպարի ամբողջականության խնդիրը: Պատմականագրական փաստերը բավարար են արդյոք, թե՞ բացերը լրացնում եք ստեղծագործական երևակայությամբ:

— Որպես կանոն՝ փաստերը չեն բավարարում. երբեմն նաև այնպիսի դեպքեր են, երբ դրանք առեցնում են: Բայց գեղարվեստը հենց նրա համար է, որ լրացնի, գեղագիտացնի, հարկ եղած դեպքում «սրբագրի» իրողությունները: Չէ՞ որ գեղեցիկն զգալն ու զննատեղն արդեն իսկ նշանակում է՝ ինչ-որ իմաստով մասնակից դառնալ նրա արարմանը: Իմ կերպարները հաճախ և ի սկզբանե ամբողջական են ու խորհրդավոր: Նրանց կեցությունը նկարագրող հետագա իրողությունները հաճախ լրացուցիչ և սյուժետային բնույթ ունեն: Ինձ համար էականը, առանձին վերցրած, նրանց կյանքի սկզբնավորությունը կամ վերջավորությունը ներկայացնելը չէ, թեև այդտեղ էլ ակներև խորհուրդ կա, այլ գլխավորապես նրանց միջոցով բազմաձև կյանքի հասանելի և անհասանելի հանգամանքները բացահայտելը: Որովհետև կրթություն է նաև չինացած բաների ընդունումը գիտակցական դաշտում, իսկ արդիականությունն այլ բան չէ, եթե ոչ գոյութենաբանության թանձրացումը՝ փոխապայմանավորված ժամանակների ներթափանցմամբ և գեղաձևումով:

— Քրիստոնեական համբերություն, անդորրություն կա Ձեր պատումի խորքում, քրիստոնյա աշխարհայացք ու հոգեբանություն: Անձնական հոգեբանական դրամաներ կամ բախումներ գրեթե չկան: Անանձնական կյանքով էին ապրում գլխավոր հերոսները, թե՞ դա Ձեր հղացումն է, կյանքի հանդեպ Ձեր վարդապետական վերաբերմունքը:

— Ինչպես քաջահայտ է, խոսքը մտքի ծառան է, և գեղարվեստն էլ ունի իր ուրույն սահմաններն ու նպատակադրումները, ավելի դիպուկ՝ «վարդապետությունը», որտեղ ձգտումը կատարյալն ու հավերժին պետք է արտահայտվի այնպիսի գիտական ճշտակատարությամբ, որ երբևէ արվեստը չհավակնի իջնել արհեստից էլ ավելի ցածր աստիճանի: Իմ ստեղծագործություններում բախումներն ու հակասությունները մատուցվում են չափազանց նուրբ դիտակետից, այնքանով, որքանով դրանք ներդաշնակվում են տրվածի բուն իսկությանը: Քրիստոնեական աշխարհայացքն իմ համոզումների և հոգեբանության առանցքում է, իսկ ստեղծաբանական տիրույթը՝ այն տարածությունը, որտեղ ընթերցողին է փոխանցվում սկզբունքների այն համախումբը, որը լիությամբ ու լրիվությամբ պատճառաբանում է անանձնական կյանքի առավելությունները: «Ամեն բան անցողիկ է, մնայուն է գեթ արժեքը, որը փշրանքն է կատարելության»,— ինչպես իմ վերջին շրջանի ստեղծագործություններից մեկում բնորոշում է հերոսներից մեկը: Այս իմաստով միանգամայն դիպուկ է Ձեր բնորոշումը:

— Առաջիկայում ի՞նչ նոր ստեղծագործության կարող է սպասել ընթերցողը:

— Վստահաբար մեկ բան կարող եմ ասել, որ քանի դեռ կամ, ասելիք լինելու է, ինչպիսի խորությամբ՝ թող վկայի ընթերցողը: Բանաստեղծությունների ևս մեկ ժողովածու են մտնող շաղկապ, կշարունակեմ նաև զրույցների, առակների, պատմությունների շարքը: Արդեն լիովին պատրաստ է «Ուսուցիչը» վերտառությամբ բարոյախրատական ստեղծագործությունը, ուր տեղ գտած մտորումներն ու պատկերագրումներն ընթերցողին լրացուցիչ, բարեպատիկ առիթ կընձեռեն՝ մտածելու անցյալի ու ներկայի, հայրենիի և եկեղեցու, մարդու և ժողովուրդների և շատ այլ հարցերի շրջագծում: Ուրիշ խոսքով՝ վիպակը մեր ժամանակի ներկայական է՝ կենցաղային դրվագներով, մարդկային հարաբերությունների սրբագրման տեսարաններով, ստեղծագործելու և հանրության կյանքին մասնակից լինելու ընդգծված անհրաժեշտությամբ: Այստեղ անդրադարձ կա նաև կեղծ և իրական աշխարհաբաղադրությանը, ինչպես նաև համաաշխարհայնացման ներբերած վնասներին ու վերահաս վտանգներին: Ընթացքի մեջ են «Ընտանիք և աստվածաբանություն»՝ աշխատասիրության ռուսերեն և անգլերեն թարգմանությունները: Տերը կամենա՝ կլինեն մասնահատուկ անդրադարձներ նաև Լուսավորիչ Հայրապետի, Մաշտոց վարդապետի մասին, ինչպես և ազատության աստվածաբանության շուրջ:

— Շնորհակալություն հարցազրույցի համար:

Հարցազրույցը՝ Մեղրի ՂՈՒԿԱՍՅԱՆԻ

Տ. Իսահակ վրդ. Պողոսյան. Բանաստեղծություններ

ԲԱՐԻ ԼՈՒՅՍ

«Ո՞ր երկրի սրտում թախծ կա այնքան, եվ այնքան ներում — դժբերկի սրտում...»: Վ. Տերյան

Մեկնում է, ահա, գիշերը անձայն, Սահուն է անլուր՝ փաթիլի մման, Շաղվում է ինչպես մերկ ծաղկափողի, Հանգչում մութի մեջ տխուր, լռելայն: Մեղմ հոսանքներով ցրում է քամին Մայթերին միրհած ծաղիկ ու տերև, Շաղն է բարձրանում կանաչ դաշտերից, Լուսին ու աստղեր մեկնում են եթեր: Երկնականարին արևն է դաշվում՝ Հանդարտ ձգելով ծանրությունն իր բարկ, Ամպերը քնքուշ հեթիաթ են ասում՝ Սահուն հոսելով ծփանքների տակ: Եվ անհունի մեջ ու երկրի վրա Վերնական քնքուշ ոյութանք է կաթում, Նուրբ ու քաղցրամուշ աղոթքը նրա Համակ աշխարհի ցավերն է զատում:

ՄՈՒՏՆ Ի ՎԻՐԱՊ

Հանգչում է օրը Քո երանաշնորհ Աչքերի վրա, Դու, անցնող երեկ Ու երազ վաղվա: Բացվում է նորը Քո հեզահամբույր Ժայռերի վրա, Դու, հառնող անցյալ՝ Վառվող անխնայ: Ամհուն գիշերվա Գալիքը զարդիդ, Քեզ ապավինած	Իմ բեկվող հոգին Տրտում է հիմա Անցնող օրերից, Չարթնող խոհերի Խիմդ ու բովերից Ու երկինք հասնող Հրատ մովերից: Հանգչում է օրը Քո երանաշնորհ ուսերի վրա, Դու, անցնող երեկ Ու գալիք վաղվա:
--	---

ԱՂՈԹԵ ԵՐԵՎՈՅԻ

Երկնքի վրա իջավ թանձր մութ,
Ցուլացին աստղերն ինչպես ծիածան,
Արևը քաշվեց ամպերի մեջ լուրթ՝
Բոցավառելով հուսառատ կածան:
Երկնքի վրա՝ պայծառ, աստղաշուրթ,
Չեփյուռ ու եթեր, երազ քաղցրամուրթ,
Դեպի անհունը ձգվող խառ հետքեր
Ու փշաքաղվող ոսկյա տարերքներ:
Երկնքի վրա՝ անզուսպ արտասուք,
Թռչող երանգներ ու փախչող բույրեր,
Ամհաս բարձունքում՝ պերճանք վեհաշուրթ,
Անվերջ սավառնող երկնածին հյուրեր:

ԽՈՐ ՎԻՐԱՊ

Խորահատակ ու խորագարդ,
Բլուրների վրա անթաթ
Բազմել է վեհ ու վիթխարի մի հոյակերտ՝
Հանդարտախոս, խաղաղահաս ու ակնդետ,
Խորահատակ, խորաթափանց,
Ակունքներով վերնագնաց:
Նայում է լուռ,
Հայում բլուր դալարներին աստվածատուր
Ու խաչազարդ խնամարկում,
Իբրև կենաց դետ ու ուրուր:
Խորահատակ ու խոհակերտ,
Ընդեղծանող ամենքի հետ՝
Բարձրանում է մինչև երկինք,
Վերացնում ամեն նախատիք:
Ապա փութով դառնում է ցած
Գագաթներից երկնագնաց
Ու վիմափոր գահին բազմած՝
Կռում է սեր, փառք ու հույսեր
Եվ աղոթքներ հեզատարած,
Արևասեր,
Արևատեր
Ու անմոռաց...
Խորահատակ ու խորագագ՝
Չվարթում են կյանք ու արև,
Մարդ ու Աստված:
Ճառագում է բոսորներով երկնապարզ,
Գեղազարդում կարոտները հազարաթև:
Խորախորհուրդ ու խորիմաց՝
Խոնարհվում է արևաբույր շողը իջած
Քո բազմաշերտ ու կենսատու վեմ ու սալին,
Նորոգվում է անվերադարձ համակ բարին
Ու խայտում է գորովը տաք քո սնարին:

Բանաստեղծություններ
← էջ 6

ՀԱՆՂԱՐՏ-ԽԱՂԱՂ

Հանդարտ, խաղաղ, ինչպես ձյունը,
Երկինքներից ամեն անգամ
Վար է իջնում քո խանդաղատ
օրհնությունը:
Հրակարմիր ու բոցակեզ քո շրշյունը
Լռեցնում է ցավ ու կսկիծ՝
Ջերմացնելով նվիրական հողն ու տունը:
Հանդարտ, խաղաղ, ինչպես սյուֆը,
Տարածվում են անհունի մեջ
Աստվածատուր խիմոն ու գութը:
Հանդարտ, խաղաղ, ինչպես օրը,
Երկարում ես թևերդ տաք
Ու ձեռնադրում քո օրորը:
Հանդարտ, խաղաղ, ինչպես միմջը,
Իջնում ես հար ու անայլայլ,
Ծագեցնում ես գեղ ու դայլայլ
Ու հռչակում ամենուրեք քաղցր ջինջը:
Երանական սավառնում են
Բախտն ու խիղճը,
Ու միաբան սրտապնդվում
Վիշտն ու ճիչը:
Հանդարտ, խաղաղ
Մեկնվել ես
Ժայռ ու ծերպին,
Ամոքում ես
Ու սատարում
Քեզ հանդիպող ամեն ելքին,
Դարմանում ես
Ամեն մի վերք
Ու հիանում
Երկնագնա մեն մի հեքով:
Հանդարտ, խաղաղ,
Երկնաբարբառ
Հրայրք կայտառ
Սավառնում են
Քո չխամրող
Վեր ու դեմքին:
Հանդարտ, խաղաղ
Մեխվել ես դու
Քերծ ու գետնին,
Քարաբլուր բազուկներով
Գրկել հպարտ
Ժայռ ու սեպին
Ու մխիթար ակունքներով
Բույր ես մեկնում,
Հուր ու երազ՝
Կյանք ու դետին:
Հանդարտ, խաղաղ լույս է կաթում
Քո զրնգում համայնի մեջ,
Դու մեղմանուշ ամբարում ես
Հոգս ու բերկրանք, կանչ ու աղերս:

ԱՆՀՈՒՆԻ ՄԵՋ

Անհունի մեջ խորհուրդ կա վեհ
Ու տառապող լուսե հեքիաթ,
Աննենզ ճախրող հույսի եթեր,
Մշտամորմոք ցավ ու դյութանք:
Անհունի մեջ՝ խաս ու խրատ
Ու մշտաբորբ վառ ասուպներ,
Ականակիթ խիմոն ու հրատ,
Երգ ու երազ տաք, ոսկեթել:
Անհունի մեջ՝ հրաշք անվերջ
Ու երկնային տեղատարափ,
Սեր ու կրակ արևաշեջ,
Զվարթառատ, աստղաթափ:

ՀԱՆԳՉՈՒՄ ԵՆ ՕՐԵՐԸ

*«Խմիր հոժար կամքով, իբրև լեղի
մի թաս,
Տառապանքիդ բաժակը՝ վաղվա
կյանքով հղի...»:
Ե. Չաքմեց*

Հանգչում են օրերը, փախչում են,
Գալիքը՝ անհայտ ու բեկվող.
Օրերը լողում ու կորչում են,
Օրերը՝ երբեմնի հորը:
Խոտոր է ճամփան ու տկլոր է,
Անգարո է եթերը զգվող.
Անտակ է ներկան ու անհայտ է,
Հակինթը մարում է մոլոր:
Մաքուր է միայն լաջվարդը,
Լուսեղեն, ողորկ ու դյութող.
Օրերը հոսում ու շիջում են,
Օրերը՝ բացվող ու անցնող:

Մալոմեի կերպարը Սուրբ Գրքում և գեղարվեստական գրականության մեջ



Կարդգես Սուրենյանց, Մալոմե, 1907 թ.

կերպարը դարձնում է զգուշացում այն մա-
սին, թե ինչպես կարող են մարմնական ցան-
կությունները և արտաքին ազդեցությունները
մարդուն մղել կործանման: Բացի այդ՝ որոշ
ավանդապատումներում Մալոմեն պատժ-
վում է կամ սատանայական պատուհասով,
կամ դժբախտ պատահարով: Թվկուրանցու
գործում թեև այս պատիժը չի նկարագրվում,
բայց ակնարկվում է, որ ամբարո վարքի հե-
տևանքը կործանումն է:

Հաջորդ ստեղծագործությունը, որին կանո-
րադառնանք, Վահագն Դավթյանի «Տեմդը»
պոեմն է, ուր Մալոմեի կերպարը ներկայաց-
վում է նորովի՝ ավանդական քրիստոնեական
ընկալումները համադրելով մոր գաղափա-
րական շերտերի հետ: Եթե Աստվածաշնչում
և միջնադարյան մեկնություններում Մալոմեն
ներկայացվում է որպես մեղքի իրականաց-
ման գործիք, ապա Վ. Դավթյանի պոեմում
նրա կերպարը ձեռք է բերում ավելի խորքա-
յին, բարդ ու հակասական բնույթ՝ դառնալով
խորհրդամիշ այն ուժերի, որոնք տանում են
դեպի անկում, բայց մաս կրում են հակասա-
կան հմայք:

Վ. Դավթյանի պոեմում Մալոմեն նույնքան
գայթակղիչ և մահաբեր է, որքան ավանդա-
կան ընկալումներում: Նրա կերպարը ար-
տացույց է գեղեցկության այն ուժը, որը կա-
րող է կործանարար դառնալ, երբ զրկված է
բարոյական ու հոգևոր բովանդակությունից:
Նա մարմնավորում է գայթակղությունը, բայց
միաժամանակ ունի խորհրդավոր, գրավիչ,
գրեթե դիվային ուժ, որն ստիպում է մարդ-
կանց ենթարկվել նրան: Վ. Դավթյանի Մալո-
մեն միանշանակորեն բացասական կերպար
չէ. նա առավելապես ներկայացվում է որպես
ճակատագրական ուժ, որի ազդեցությունն
անխուսափելի է: «Տեմդը» պոեմում Մալո-
մեի կերպարն ստանում է ավելի լայն՝ քաղա-
քական և պատմական նշանակություն: Նա
դառնում է դարերի ընթացքում կրկնվող այն
ուժերի մարմնավորումը, որոնք իրենց գայ-
թակղիչ բնույթով մարդկանց մղում են ճակա-
տագրական որոշումների: Եթե Աստվածաշն-
չում Մալոմեն միայն գործիք է Հերովդիայի
ձեռքում, ապա Դավթյանի պոեմում նա միա-
ժամանակ ինքնուրույն ուժ է, որը գերում է,
բայց մաս ավերում: Այս տեսանկյունից Մալո-
մեն կարող է ընկալվել որպես մարդկության
պատմության մեջ տարբեր ժամանակներում
գործող կործանարար գայթակղությունների
խորհրդամիշ՝ լինի դա քաղաքական դավա-
ճանություն, թե բռնապետական գրավչու-
թյուն, որն սկզբում թվում է գրավիչ, բայց հե-
տո հանգեցնում է անկման:

Ինչպես ավանդական մեկնություննե-
րում, այնպես էլ Վ. Դավթյանի պոեմում, Մա-
լոմեի կերպարը հակադրվում է Հովհաննես
Մկրտչին: Հովհաննես Մկրտիչը ներկայաց-
վում է որպես ճշմարտության քարոզիչ, որը
չի վախենում ասել այն, ինչ բոլորին հայտ-
նի է, բայց լռում են: Իսկ Մալոմեն այն ուժն է,
որը ճնշում է ճշմարտությունը, որովհետև

նրա ազդեցության ներքո ճշմարտությու-
նը դառնում է վտանգավոր, անցանկալի:
Սա խորհրդանշական է մաս Վ. Դավթյանի
ստեղծագործության քաղաքական ենթա-
տեքստի տեսանկյունից. այն դարերում, երբ
ճշմարտությունը վտանգավոր էր, հաճախ
հայտնվում էին սալոմեները, որոնք իրենց
ազդեցությամբ մերժում էին արդարությունը
և հրահրում դրա կործանումը:

Մալոմեի վերաբերյալ մյուս ուշագրավ
ստեղծագործությունը Օսկար Ուայլդի «Մալո-
մե» ողբերգությունն է, որտեղ նա ներկայաց-
վում է որպես «ֆատալ»՝ ճակատագրական
կին, որն ունի սեփական ցանկությունները
և ուժը: Օսկար Ուայլդի պիեսում, որ հայերեն
թարգմանել է Վահան Տերյանը, Մալոմեն, ի
տարբերություն Սուրբ Գրքի և հայ գրակա-
նության, ինքնուրույն է հանցավոր վճիռը
կայացնում. նա սիրահարվում է Հովհաննես
Մկրտչին և մերժվելով՝ վրեժխնդիր է լինում:

Մալոմեի կերպարը քրիստոնեական մշա-
կության հաճախ ներկայացվել է որպես գայ-
թակղիչ և խաբուսիկ կին, որի պարը դարձավ
մի մեծ աստվածային մարգարեի՝ Հովհաննես
Մկրտչի մահվան պատճառ: Նրա կերպարը
Աստվածաշնչում և քրիստոնեական ավան-
դություններում բավականին բարդ է և բազ-
մաշերտ: Նա ներկայացվում է որպես երի-
տասարդ, գեղեցիկ, բայց միևնույն ժամանակ
մանիպուլյացիայի ենթարկվող աղջիկ, որը
դառնում է մոր՝ Հերովդիայի դաժան ծրագ-
րի գործիքը: Մալոմեն, ըստ Աստվածաշնչի,
Հերովդեսի առաջ կատարում է գայթակղիչ
պար, որն ունի դավադիր նպատակ, սակայն
նա սկզբնապես չունի որևէ անձնական թշնա-
մանք Հովհաննես Մկրտչի հանդեպ: Հերովդե-
սին ուղղված նրա խնդրանքը՝ Մկրտչի գլու-
խը սկստեղի վրա մատուցելու վերաբերյալ,
պայմանավորված է մոր ազդեցությամբ: Այս
տեսանկյունից Մալոմեին կարելի է դիտար-
կել որպես անինքնուրույն, հեշտ ներգործվող
կերպարի, որը դեռ չի ձևավորել իր բարոյա-
կան սկզբունքները: Նա ենթարկվում է Հերով-
դիայի հրամանին՝ առանց հարցադրելու իր
արարքի հետևանքները:

Մալոմեն հաճախ մեկնաբանվում է որ-
պես կնոջ հրապույրի, մարմնական ուժի ու
գայթակղության մարմնացում: Նրա պարը
ոչ միայն հաճույք է պատճառում Հերովդե-
սին, այլև դրդում նրան անխոհեմ որոշում
կայացնելու: Այս իմաստով Մալոմեն ներկա-
յացվում է որպես գայթակղության և մահվան
պատճառ դառնալու խորհրդամիշ: Բայց եթե
ավելի խորը վերլուծենք, Մալոմեն իրակա-
նում չունի այն լիակատար իշխանությունը,
որը հաճախ վերագրվում է նրան արվես-
տում: Նա պարզապես օգտագործվում է իր
մոր կողմից՝ դառնալով քաղաքական և անձ-
նական վրեժխնդրության գործիք:

Մալոմեն դարձել է արվեստի և գրակա-
նության կարևոր կերպարներից մեկը: Շատ
արվեստագետների համար նա ոգեշնչման
աղբյուր է. նրա կերպարը հետաքրքրել է ոչ
միայն գրողների, այլև նկարիչների և երաժշ-
տագետների: Մալոմեին նկարել են Սանդրո
Բոտիչելլին, Ալբրեխտ Դյուրերը, Տիցիա-
նը, Ռեմբրանդտը, Կարպաչով, Լուկաս Կրա-
մախ Ավագը, Ռուբենսը, Գյուստավ Դորեն,
Վարդգես Սուրենյանցը, Լեյբա Անտոկուլ-
կին և ուրիշներ: Ռիխարդ Շտրաուսը Օսկար
Ուայլդի պիեսի հիման վրա ստեղծել է «Մալո-
մե» օպերան, Ֆլորան Շմիտը՝ «Մալոմեի ող-
բերգությունը» բալետը:

Մալոմեին տարբեր ժամանակներում տար-
բեր կերպ են մեկնաբանել: Միջնադարյան
քրիստոնեական արվեստում Մալոմեն հա-
ճախ պատկերվել է որպես մեղավոր և անբա-
րոյական կերպար: 19–20-րդ դարերում Մա-
լոմեի կերպարը փոխվեց. նա սկսեց ընկալվել
որպես խորհրդապաշտության, ֆեմինիզմի
և ազատության խորհրդանիշ:

Չնայած Մալոմեն հայ գրականության մեջ
հաճախ չի հանդիպում որպես առանձին
կերպար, նրա պատմության մետաֆորան՝
որպես կրքի, ճակատագրի, մանիպուլյա-
ցիայի և իշխանության խորհրդամիշ, արտա-
ցվում է հայ գրողների շատ ստեղծագործու-
թյուններում:

Ահարոնյան քահանայության հաստատումը...

← էջ 5

Ահա այս տրամաբանությամբ քահանայական զգեստները ևս ունեն կարևորագույն նշանակություն. դրանք մատնանշում են այն հանգամանքը, որ քահանաներն այս կյանքում ունեն հստակ նախասահմանված առաքելություն: Նրանց արտաքին տեսքը պետք է լինի ազդեցիկ և դաստիարակիչ: Հրեա մեկնիչներն ուշադրություն են հրավիրում այն հանգամանքի վրա, որ զոհաբերության վավերականությունը կախված էր թե քահանայի հանդերձանքից և թե ամեն տեսակ մատնանշանությունից, որ վերաբերում էր նրանց ծառայությանը: Ուստի, եթե զգեստները թերի են, ապա անվավեր է դառնում նաև կատարված զոհաբերությունը:

Քահանայական զգեստների ընդհանուր թիվը 8-ն է. հասարակ քահանաների դեպքում՝ 4, իսկ քահանայապետի դեպքում՝ 8: Առաջին չորսը երկուսի համար էլ ընդհանուր են:

1. *Անդրավարտիք* — Այն պետք է պատրաստված լիներ կտավից և քահանաների մեջքից մինչև սրունքներ հասներ:

2. *Շապիկ* — Սպիտակ բեհեզից հյուսված հանդերձ, որ պետք է լիներ երկար և ծածկեր քահանայի ոտքերն ամբողջությամբ՝ մինչև ոտքի թաթերը:


3. *Գոտի* — Բեհեզյա էր, մախշազարդ: Երկարությունը հասնում էր մոտ 15 մետրի, մեջքին կապված լինելուց զատ՝ այն խաչաձև փաթաթվում էր կրծքավանդակին:

4. *Ապարոշ* — Գլխի փաթոց, որ դարձյալ պատրաստված էր նուրբ բեհեզից:

Քահանայապետի դեպքում սրանց ավելանում էին ևս 4-ը.

5. *Պատմունճան* — Այն հագնում էին շապիկի վրայից. ավելի կարճ էր, քան վերջինս, և հասնում էր մինչև սրունքներ: Հյուսված էր բացարձակապես մեկ կտորից, «որպեսզի այդ զգեստը չպատռվի» (28:32), և ստորին հատվածում ուներ գործած նռան ծաղկաբողբոջներ ու ոսկե զանգակներ: Վերջիններս զգուշացնում էին քահանայապետի՝ դեպի Սրբություն Սրբոց շարժվելու մասին և ծառայում էին նրան իբրև հիշեցում՝ իր պարտականություններն օրենքով սահմանված կարգով կատարելու մասին: Դրանց միջոցով ժողովուրդը տեղեկանում էր, որ քահանայապետը Սրբություն Սրբոցի տարածքում է: Սուրբ Գիրքն ասում է. «*Դա թող հագնի Ահարոնը, որպեսզի երբ պաշտամունք է կատարում, Տիրոջ առաջ սրբարան մտնելիս ու ելնելիս լավեն դրանց արձակած ձայները, և Ահարոնը չմեռնի*» (ելք 28:36): Երկրորդ բացատրությամբ՝ զանգակներն անհրաժեշտ էին, որ քահանայապետի հանկարծակի մահվան դեպքում մարդիկ ստիպված չլինեին մտնել Սրբություն Սրբոց, ինչը խստորեն արգելված էր: Ուստի, մախապես քահանայապետի ոտքից պարան էին կապում՝ նմանատիպ դեպքերը կանխելու և հարկ եղած դեպքում, առանց ներս մուտք գործելու, նրան պարանի օգնությամբ դուրս քաշելու համար:

6. *Եփուդ* — Այն պատրաստված էր մաքուր ոսկուց, կապույտ, ծիրանագույն և կարմիր մանվածքից ու նրբափայլ բեհեզից: Հագնում էին պատմունճանի վրայից. ավելի կարճ էր, քան վերջինս, և հասնում էր գոտկատեղից մինչև ծնկներ: Եփուդի երկու ուսերի վրա պետք է լինեին զմրուխտյա ակամաքարեր՝ վրան քանդակված Իս-



րայելի տասներկու ցեղերի անունները. «*Ահարոնը, ի հիշատակ նրանց, Աստծու առաջ իր երկու ուսերի վրա պետք է բարձրացնի Իսրայելի որդիների անունները*» (ելք 28:12): Աստվածաշնչի որոշ հատվածներում, որտեղ խոսվում է կուռքերի կամ կռապաշտության դեպքերի մասին, առկա են եփուդի վերաբերյալ հիշատակություններ, որոնք, ուսումնասիրողների պնդմամբ, վկայում են, որ զգեստի այս տեսակը փոխառված է եղել Եգիպտոսից ու Միջագետքից (Պատ. 8:27, 17:5, 18:17–21), որտեղ ոսկուց պատրաստված զգեստներով սովորաբար ծածկում էին կուռքերի արձանները՝ խորհրդանշելով ծիսական արարողությունների ժամանակ նրանց ներկայությունն ու մասնակցությունը: Եփուդը գործածական էր նաև ոչ քահանաների պարագայում, օրինակ՝ մանուկ Սամուելը, որը, «*Եփուդ հագած, Տիրոջ առջև ծառայություն էր անում*» (1 Թագ. 2:18): Եփուդի վրա ամրացվում էր դատաստանի լանջապանակը:

7. *Լանջապանակ* — Պատրաստված էր ոսկուց, կապույտ, ծիրանագույն և կարմիր մանվածքից ու նրբափայլ բեհեզից: Սրա վրա չորս շարքով ամրացված էին տասներկու քարեր, որոնք խորհրդանշում էին Իսրայելի ցեղերին. այս կերպ արտահայտվում էր ցեղերի միությունը: Սրա վրա էին դրվում նաև Ուրիմն ու Թումիմը, որոնք ծառայում էին իբրև միջոց՝ Աստծու կամքն իմանալու համար. «*Դա թող լինի Ահարոնի կրծքի վրա, երբ նա, սրբարան մտնելով, ներկայանա Տիրոջը: Ահարոնը Տիրոջ առաջ իր կրծքի վրա միշտ թող կրի Իսրայելի որդիների դատաստանի լանջապանակը*» (ելք 28:30): Ի տարբերություն մնացյալ պարագաների, որոնց նկարագրությունը տրվում է, Ուրիմի և Թումիմի պարագայում դրանց պատրաստման մասին չի խոսվում:

Հայտնի է, որ աստվածություններին հարցումներ ուղղելու սովորությունը և «այդ» կամ «ոչ» պատասխանակնկալելը հնագույն ժամանակներում տարածված էին ամբողջ Մերձավոր Արևելքում: Առանձնահատուկ հետաքրքրություն են ներկայացնում բաբելոնյան որոշ բնագրեր, որոնք պարունակում են հիշյալ հարցումների մասին հետաքրքրական տարբեր պատմություններ: Գոյություն ունեին «դրական» և «բացասական» քարեր, որոնք հիմնականում եղել են երկու տեսակի՝ բաց ու մուգ, և լայնորեն կիրառվել են Միջագետքում: Երեք անգամ անընդմեջ դուրս եկած քարը հուշում էր մախապես տրված հարցի պատասխանը:

8. *Խույր* — Քահանայապետի պարագայում սա փոխարինում է ապարոշին: Զգեստի վերջին կտորն է, որի վրա ճակատի կողմից ամրացված էր մաքուր ոսկուց պատրաստված թիթեղ՝ հետևյալ

գրությամբ՝ «*Ընծայված Տիրոջը*» (ելք 28:36, գրաբարում՝ «*Սրբութիւն Տեառն*»): Սա պետք է ծառայեր իբրև մշտական հիշեցում քահանաներին և բոլոր նրանց, ովքեր կտեսնեին այդ գրվածքը, որ բոլոր հոյակապ զգեստները, դրանց զարդարանքները՝ ոսկով և թանկարժեք քարերով, ոչ թե մարդուն վեհացնելու համար են, այլ Տիրոջ անունը բարձրացնելու: Ելք 28:38-ում կարդում ենք. «*Դա կկապես Ահարոնի գլխին դրվող խույրի ճակատին: Ահարոնը թող իր վրա վերցնի այն բոլոր մեղքերը, որ Իսրայելի որդիները կգործեն սուրբ բաներ ընծայաբերելու ժամանակ: Դա միշտ Ահարոնի ճակատին պետք է լինի, որպեսզի այդ ընծաները ընդունելի լինեն Տիրոջը*»: Այն, ինչ զոհաբերվում է Աստծուն, պետք է լինի կատարյալ, առանց որևէ թերության: Անշուշտ, հնարավոր էր, որ զոհաբերությունների ընթացքում լինեին անմշան բացթողումներ, սակայն Աստված պատրաստ է ընդունելու զոհը, եթե այն մատուցողն ունի մաքուր և անկեղծ նկատառումներ: Խույրի վրայի գրվածքը խորհրդանշում էր ժողովրդի անձնուրաց ցանկությունը՝ ամբողջությամբ նվիրվելու Տիրոջը: Ծառայության ընթացքում այն մշտապես պիտի լիներ քահանայապետի ճակատին ոչ միայն որպես իշխանության նշան, այլև՝ երբ նա պատասխանատվության էր ենթարկվելու ծիսական օրենքների և զոհաբերությունների ընթացքում թույլ տրված օրինազանցությունների համար:

Քահանայական զգեստներից յուրաքանչյուրն ուներ իր նշանակությունը: Դրանք հստակ նպատակառված և զանազան ազդեցություն ունեցող մարդկային զանազան մեղքերի ու արատների դեմ: Այսպես, անդրավարտիքը կանխելու էր մարդու մեջ սեռական ուսմանություն դրսևորելու հակումը: Շապիկը, որն ամբողջությամբ սպիտակ էր, ուղղված էր սպանություն կատարելու ցանկության դեմ. քահանայապետի դեպքում այն, բնականաբար, հարմար չէր սպանության համար, երկար էր և կարող էր միանգամից արյունոտվել. գիտակցորեն այս ամենը պիտի խանգարեր սպանություն գործելու մտադրությանը: Ապարոշը կամ քահանայապետի խույրը հպարտության մեղքի դեմ էր, իսկ գոտին իր հերթին առանձնացնում էր մարմնի վերին ու ստորին հատվածներն իրարից:

Այսպիսով քահանայական 4 հիմնական զգեստները, հատկապես հասարակ մարդկանց պարագայում, կանխում էին հակումը դեպի վերոնշյալ արատները: Իսկ քահանայապետի դեպքում այս գործառնություններն ավելանում էին, քանի որ ավելանում էր զգեստների քանակը: Օրինակ՝ պատմունճանի գործառնություն ուղղված էր՝ կանխելու մարդու մեջ չարախոսության

և բամբասանքի հակումը, որովհետև դրանից կախված զանգակներն անընդհատ հիշեցնում են, որ մարդիկ պետք է հետևեն իրենց յուրաքանչյուր խոսքին ու գործին: Հարց կարող է առաջանալ, թե ինչու այս զգեստը չունի հասարակ քահանա: Հասարակ մարդկանց պարագայում չարախոսությունը ևս ունի որոշակի դրսևորումներ, բայց եթե խոսքը մեծանում մեկի մասին է՝ հարուստի կամ իշխանավորի, ապա նրա չարախոսությունն ավելի վտանգավոր է և հասարակ ժողովրդի կողմից կարող է ընդօրինակվել ու ստանալ սովորույթի ուժ: Պետք է շեշտել, որ քահանայապետը սովորաբար առնչվում էր առավել բարձր դիրք ունեցող մարդկանց հետ:

Քահանայապետական հաջորդ զգեստը՝ եփուդը, առավել հետաքրքրական է, քանի որ սկզբնապես եղել է կռապաշտ քահանաների հազուստի հիմնական բաղադրիչ, որը կրել են կրծքավանդակի շրջանում, իսկ քահանայապետի դեպքում այն իջնում է ավելի ներքև՝ հակակշռելու համար հեթանոս քահանաներին: Ուստի, եփուդի գործառնությունը կռապաշտության հակումը կանխելն է:

Քահանայապետի զգեստի բաղադրիչներից հաջորդը՝ խույրը, ինչպես արդեն նշվեց, ուղղված էր հպարտության մեղքի դեմ, որովհետև մարդն ինչ ստանում է իր կյանքում՝ յուրաքանչյուր հաջողություն կամ որևէ այլ լավ բան, Աստծուց պարզ և է: Իսկ մեծանուն մարդիկ երբեմն հպարտանում են սեփական հաջողություններով՝ դրանց միակ պատճառ բերելով իրենց անձը, դիրքն ու կարողությունները:

Քահանայական ձեռնադրություն և օծում

Ձեռնադրության վերաբերյալ առաջին հրահանգներին հանդիպում ենք Ելք 28-րդ գլխում. «*Կոծես նրանց, կնվիրագործես նրանց ձեռքերն ու կարբագործես նրանց, որպեսզի ինձ համար քահանայություն անեն*» (28:41), այնուհետև՝ 29-րդ և Ղևտ. 8–9-րդ գլուխներում: Հետաքրքրական է այն հանգամանքը, որ այս հրահանգները տրվում են Մովսեսին, այսինքն՝ թե քահանաներին և թե քահանայապետին պետք է «*օծեր*», «*օրհներ*» և «*սրբեր*» Մովսեսը՝ հատուկ սահմանված կարգով. «*Մովսեսը, վերցնելով օծության յուղից ու զոհասեղանի վրայի արյունից, ցանցե Ահարոնի ու նրա հանդերձանքի, նրա որդիների ու նրանց հանդերձանքների վրա և սրբագործեց Ահարոնին ու նրա հանդերձանքը, նրա հետ նաև նրա որդիներին ու նրանց հանդերձանքները*» (Ղևտ. 8:30):

Տեսնում ենք, որ այս կարգի կատարման համար անհրաժեշտ պայմաններ են օծելը, սրբելը և օրհնելը, որոնք այսօր էլ քրիստոնեական Եկեղեցում ձեռնադրության խորհրդի կատարման համար անհրաժեշտ պայմաններ են: Վերոնշյալ հատվածներում չկա բուն ձեռնադրության դրվագ, սակայն օծմամբ, օրհնությամբ և մաքրագործմամբ Ահարոնն ու իր որդիները դառնում են քահանաներ: Սուրբ Գրքում ձեռնադրության վերաբերյալ հատվածներ հանդիպում են Թվեր 27:18, Գործք 6:6, 8:17, 1 Տիմ. 4:14 և այլ տեղիներում:

Ահարոնի և նրա որդիների օծումից հետո Մովսեսը պատվիրում է նրանց. «*Վկայության խորանի դռնից յոթ օր դուրս չեք գա, մինչև ձեր նվիրագործման օրերի լրումը, որովհետև Տերը յոթ օրում պետք է*

սրբագործի ձեզ» (Ղևտ. 8:33): Մովսեսը քահանաներին ուղղված իր խոսքում անընդհատ շեշտում է «*Այդպես է ինձ պատվիրել Տերը*» արտահայտությունը. հավանաբար քահանաների մեջ կար որոշակի դժգոհություն, ինչը երևում է Ղևտ. 8:36 համարից, որտեղ կարդում ենք. «*Ահարոնն ու նրա որդիներն արեցին*», (եբրայերեն բնագրում «*արեցին*»-ի փոխարեն՝ «*արեց*»), այսինքն՝ Մովսեսի հրահանգները հոժարությամբ կատարեց միայն Ահարոնը. «*այն ամենը, ինչ որ Տերը պատվիրել էր Մովսեսին*»: Քահանաների մտածումն այս դեպքում ունի հետևյալ ձևակերպումը. «*Մենք ընտրվել ենք Աստծու կողմից և լավ գիտենք, թե ինչ է պետք անել*»: Ահա այս տրամաբանությամբ պետք է դիտարկել հետագայում Նադաբի և Աբիուդի մեղքը:

Նկատելի է, որ քահանաներն ինքնուրույն գործելու որոշակի հակում ունեն՝ առանց համապատասխանեցնելու և համաձայնեցնելու իրենց քայլերը Մովսեսի հետ: Բայց չէ՞ որ Օրենքն ստացել է Մովսեսը, ոչ թե նրանք: Հարց է առաջանում. քահանաները գործում են ըստ Օրենքի, թե՛ երբեմն օրենքից անկախ են, որովհետև պատմությունից հայտնի են շատ դեպքեր, երբ քահանաներն իրենք չէին պահում Օրենքը. «*Այդ ամբարիշտ ու չքահանայապետ Յաաֆնի ծայրահեղ մոլորության պատճառով այնպես եռանդագին սկիզբ դրվեց այլազությանն ու հեթանոսությանը, որ այդուհետ քահանաներն անտեսում էին զոհասեղանի սպասավորությունն ու տաճարի ծառայությունը, արհամարհում ողջակեզի զոհաբերությունները և կոչնազանգի կանչելուն պես շտապում էին մասնակցել ըմբշամարտի մրցասպարեզում տեղի ունեցող անօրեն տեսարանին: Հայրերի պատիվն արհամարհում էին և անօրեն հեթանոսության փառքը գերադասում օրհնության փառքից*» (2 Սալ. 4:13–15):

Քահանաների մեջ ինքնուրույն գործելու հակումը կարող է բխել այն հանգամանքից, որ նրանք, ի սկզբանե լինելով Սրբարանի ծառայողներ, չէին ցանկանում իրենց առանձնացնել Մովսեսից, ինչն էլ հանգեցնում էր նմանատիպ դրսևորումների: Այդուհանդերձ, կարևոր է արձանագրել մեկ փաստ, Աստծո հետ հանդիպումը պետք է տեղի ունենա միջնորդի միջոցով, և միջնորդներն այս դեպքում հենց իրենք են՝ քահանաները:

Արմենակ ԱՌԱՔԵԼՅԱՆ
Գագիկ արկ. ԱՌԱՔԵԼՅԱՆ

ՔՐԻՍՏՈՆՅԱՐԱՆ ԳԵՂԵՍԻԱՆ

Կրոնական, մշակութային, լրատվական երկշաբաթաթերթ

Հիմնադիր՝

Մայր Աթոռ Սուրբ Էջմիածին

Հրատարակիչ՝

«Քրիստոնյա Հայաստան»
թերթի խմբագրություն

Գլխավոր խմբագիր՝

Նարինե Հովհաննիսյան

Գրանցման վկայական՝ 624

Խմբագրության հասցեն՝

Մայր Աթոռ Սուրբ Էջմիածին

Հեռախոս՝ (010) 517 280

Էլ. փոստ՝

qristonyahayastan1@gmail.com

qristhay@etchmiadzin.am

web կայք՝

krishayas.wordpress.com

etchmiadzinlibrary.am/en/

kristonya-hayastan

Ստոր. տպագր. 15.05.2025 թ.

Տպաքանակը՝ 1265